

**ጳውሎሲ
ቆሮንቶሴ አሳስ
ፃፊዳ ኮይሮ ኪታ
ጊዶ ቆፋ**

ጳውሎሲ ቆሮንቶሴ አሳስ ፃፊዳ ኮይሮ ኪታይ ፃፊቲዳይ ኢዚ ካሴ ቆሮንቶሴን ኤሲዳ ምሳ ኬሳ ጊዶን ዲዛ አማኖን ዱሳ ጊሺኔ አማኖ ጊሽ ዴንዲዳ ሜቶታ ቢርሻናስ ጊዲኮ። ሄ ምዴ ቆሮንቶሴ ካታማያ ኩሜሳ አላሜን ኤፊቲዳ ጊሪኬ አሳ ካታማ ጊዶይሳፔካ ቦላራ አካያ ጊቴቲዛ እሮሜ ካዎይ ሃሪዛ ዋና ካታማ። ሂና ሄ ካታማያ ኢዚን ዳሮ ጊታ ዛልዔይ ዛልዔቲዛሶ። ሃንኮ ዴሬ ምጋ ባጋራ ጊዲኮ ዳሮ ዲቻ ቦላ ዳወሲኔ ኢታ ሃኖኒኔ ዱማ ዱማ ሚሼ አማኖን ዳሮ ኤፊቲዳሮ።

ሃዋሬይ ሃራፔካ ሎዔሲ ያሊዳይ ምሳ ኬሳይ ጊዶን ዲዛ ሻኮቴሳ ጊሽ፣ ኢስታ ኢታ አሳ ጊሽ፣ ላይማ ጊሺኔ ኤኮኔ ጌሎ ጊሽ፣ ምሳ ኬሳ ጊሽ፣ ያሎ አያና ኢሞታታ ጊሺኔ ሃይቆፔ ዴንሳ ጊሻሳ። ሄሳሶካ ሃዋሬይ ሚሺራቾ ቃላዛ ሃይታ ሃ አይሻታ ቦላ ኢስታስ ሎዔሲ ሚንሲ ዛሮ ኢሜስ።

“ሲቆይ” ያሲ ባ አሳስ ኢሚዳ ኢሞታ ኡባፌ አዴስ ጊዲዳይሳ ቆንጨሲዛይ ታማኔ ሄቫንሶ ሼምፖይ ሃይሳ ሃ ማፃፋ ጊዶን ዳሮ ኤፊቲዳ ኪፍሴ ጊዲ ቆፊቴስ።

ሃ ማፃፋይ አይኪዳ ኩሜሳ ቆፋ

ጌሎሶ 1:1-9

አማኒዛይታ ጋርሳን ሜዴቲዳ ሻኮቴስ 1:10-4:21

ኢታ አሶኔ ሶ አሳ ዱስ 5:1-7:40

አማኒዛይታኔ አማኖንታ አሳ 8:1-11:1

አማኒዛይታ ዱሲኔ ያሴ ጎይኖ ምጋ 11:2-14:40

ሃይቆፔ ኪርስቶሳ ዴንሲኔ አማኒዛይታ ዴንሲ 15:1-58

ዩቡዳን ዋዩ ቦላ ዲዛ አማኒዛይታ ማዳናስ ኬሶ ሚሽ ሺሾ

16:1-4

ኩሻ ቆፋ 16:5-24

¹ ያሳ ሼኔን ዩሱስ ኪርስቶሳስ ኪቴታናስ ያይጌቲዳ ጳውሎሳፔኔ ኑ ኢሻ ሶስቲኔሴፔ፤

² ቆሮንቶሴን ዲዛ ያሳ ምሳ ኬሳስ፤ ጎዳ ዩሱስ ኪርስቶሳስ ዱማቲዳይታሲኔ ኢስታሳራ ኑሳራ ጎዳ ጊዲዳ ጎዳ ዩሱስ ኪርስቶሳስ ሱንሳ አዋን አዋንካ ያይጊዛ አማኒዛይታራ ጊዳናስ ያይጌቲዳ አሳ

ኡባስ።³ ኑ አዋ ያሳፌኔ ጎዳ ዮሱስ ኪርስቶስ ሲከታተል ሳሮይ ኢንቴስ ጊዶ።

የሳስ ጋላታ

⁴ ጎዳ ዮሱስ ኪርስቶስ ባጋራ ኢንቴስ ኢሜቲዳ ያሳ ከያቴላ ጊሽ ኡባ ዎዴ ኢንቴ ጊሺካ ታኒ ያሳ ጋላታይስ።⁵ ጋሶይ አይ ዮዎንካ፤ ሄሲካ ሃሳያን ጊዲን ኤራቴላ ኢንቴ ኡባን ዱሬቲዴታ።⁶ ኪርስቶስ ጊሽ ኑ ኢንቴስ ማርካቲዳይሲ ኢንቴ አቻን ማኒዴስ።⁷ ሄሳ ጊሽ ኢንቴ ዮሱስ ኪርስቶሲ ቆንጫና ጋላስ ናጊሺን አያና ኢሞቴላታ፤ አይኮይካ ኢንቴስ ፓጩና።⁸ ጎዳ ዮሱስ ኪርስቶሲ ናምዓንሶ ያና ጋላሳን ኢንቴ ኢንቴ ቦላ ቦሮይ ባይንዳ ቤታና ማላ ወርሴስ ጋካናስ ኢዚ ኢንቴና ሎዔስ ናጋና።⁹ ኢዚ ባ ናዛ ኑ ጎዳ ዮሱስ ኪርስቶስ ኢሲፌቴላኮ ኢንቴና ዔይጊዳ ያሲ ኢዚ አማኔቲዳ ያሳ።

ቆሮንቶሴ ዎሳ ኬላ ጋርሳን ማዴቲዳ ሻኬቴስ

¹⁰ ታ ኢሻቶ! ኢንቴ ጋርሳን ሻኬቴሲ ዶንታ ማላ ኢንቴስ ኢሲ ዎዝናይኔ ኢሲ ቆፋይ ዳና ማላ ኢንቴ ኢንቴ ጋርሳን ኢሲኖ ጊዳና ማላ ጎዳ ዮሱስ ኪርስቶስ ሱንሳን ታ ኢንቴና ዎሳይስ።¹¹ ታ ኢሻቶ! ኢንቴ ጋርሳን ፓላማይ ዲዛይሳ ታ ቃሎዔ ሶ አሳ፤ ሲያዲስ።¹² ዮዎዚካ ሃይሳ ማላ፤ ኢንቴ ጋርሳን ኢሲ ኢሲ አሳይ “ታ ጳውሎሳ ባጋ” ጌስ፤ ባጋይ ቃሴ “ታ አጲሎሳ ባጋ” ጌስ፤ ባጋይ ቃሴ “ታ ኬፋ ባጋ” ጊሺን ሃራይ ቃሴ “ታ ኪርስቶስ ባጋ” ጌስ። *¹³ ሂስቲኮ ኪርስቶሲ ሻኬቲ ዎዲዴ? ኢንቴ ጊሽ ጳውሎሲ ካቄቲዴ? ዎይኮ ጳውሎሳ ሱንሳን ማግቄቲዴቲ? ¹⁴ ኢንቴ ጊዶፌ ቄሪስጳላ፤ ጋዩዮሳ፤ አቲን ሃራ አናካ ታ ማግቆንታ ጊሽ ያሳ ጋላታይስ። * ¹⁵ ሄሳ ጊሽ አኒካ “ታ ጳውሎሳ ሱንሳን ማግቄታዲስ” ጋና አሲ ዴና። ¹⁶ ቱሙካ ኢስቲፋኖሴ ሶ አሳ ማግቃዲስ። ሄይታ፤ ሃራ ታ ማግቄዳኮኔ ታ ኤሪዛዴይ ዴና። * ¹⁷ ኪርስቶሲ ታና ኪቲዳይ ማሺራቾ ቃላ ዮታናስ አቲን ማግቃናስ ጊዴና። ኪርስቶስ ማስቃሌይ ሃዳ ጊዶንታ ማላ ታ አሳ፤ ጊዲዳ ጨንጫቴላን ሳባኪኬ።

የሳ ዎልቃኔ ኤራቴስ ጊዲዳ ኪርስቶስ

¹⁸ ማስቃሌዛ ኪታይ ጳያና ዲዛይታስ ኤያቴላ። ጊዶ አቲን አታና ዲዛ ኑስ ጊዲኮ ያሳ ዎልቃ። ¹⁹ “ጨንጫታ ጨንጫቴላ

* 1:12 ኬፋ ጉሲ ጳፀሮላ ጉስ። * 1:12 ሃዋ 18:24 * 1:14 ሃዋ 18:8፤ 19:29፤ አሮ 16:23 * 1:16 1ቆሮ 16:15

ታ ኢስታሬ ዳይሳና፤ ኤራንቻታ ኤራቴሳ ታ ሃዳ አሳና” ጌቴቲ ጌሻ ማፃፍን ፃፌቲደስ። *

20 ጨንጫይ አዋን ዲዜ? ታማሪዳ ኤራይ አዋን ዲዜ? ሃይሳ ዎዴዛ ፒልጊ ኤሪዛይ አዋን ዲዜ? ያሲ ሃ አላሜዛ ኤራቴሳ፣ ኤያቴስ አሲቤኔ? * 21 ያሳ ኤራቴሳፌ ዴንዲዳይሳን አላሜይ ባ ኤራቴሳ ጋሶን ያሳ ኤሮይ ያኒን ሳባኮ ኤያቴሳን አማኒዛይታ አሻናስ ያሳ ሹኔ ጊዲደስ። 22 አይ ዎዴካ አይሁዳቲ ዱማ ማላታ ኮዩቴስ። ጊሪኬ አሳቲ ቃሴ ኤራቴሳ ኮዩቴስ፤ 23 ኑኒ ጊዲኮ ካቁቲዳ ኪርስቶሳ ሳባኮስ። ሄሲካ አይሁዳታስ ዱጴ፤ አይዛቤታስ ቃሴ ኤያቴሳ። 24 ያሲ ዌይጊዳይታስ ኢስቲ አይሁዳታ ጊዲን ዎይኮ ጊሪኬ ዴሬ አሳ ጊዲኮካ ኪርስቶሲ ያሳ ዎልቃኔ ያሳ ኤራቴሳ። 25 ጋሶይካ አሳ ኤራፔ ያሳ ኤያቴሲ አዲዳ ኤራቴሳ፤ አሳ ሚኖቴሳፌ ያሳ ላፋቴሲ አዲስ፤

26 ታ ኢሻቶ! ካሴ ኢንቴ ዌይጌቲዛ ዎዴ ኢንቴ አይ ማላ አሳኮኔ አኔ ቆፒቴ። አሳ ቆፋ ማላ ጊዲኮ ኢንቴሬ ዳሪዛይቲ ኤራታ ጊዴኬታ። ኢንቴሬ ዳሮቲ ዎልቃይ ባይንዳይታ፤ ዳሮቲካ ጊታ ኬሳ አሳፔ ዩሌቲቤኬታ። 27 ጊዶ አቲን ያሲ ኤራታ ዩላቻናስ ዴራፔ ኤያታ ዶሪደስ፤ ያሲ ሚኖታ ዩላቻናስ አላሜዛፔ ዳቡራንቻታ ዶሪደስ። 28 ያሲ ሃንኮ አማኖንታ አሳ አቻን ዴቴስ ጌቴቲ ኤራቲዛ ሚሻታ ባይንዳ ሚሻ ማላ አሳና ሃይሳ አላሜዛን ሌቁቲዳይታኔ ካዉዩዳይታ ላፋታ ዶሪደስ። 29 ሄሳካ ኢዚ አሲዳይ አኒካ ኢዛ ሲንሳን ጨቁቶንታ ማላ። 30 ኢንቴና ቃሴ ያሲ ዩሱስ ኪርስቶሳራ ኢሲፌቴሲ ዳና ማላ አሲደስ። ሄሳ ጊሽ ያሲ ዩሱስ ኪርስቶሳ ኑ ኤራቴሳ፣ ኑ ዌሎቴሳ፣ ኑ ጌሻቴሲኔ ኑና አሽዛዴ ጊዳና ማላ አሲደስ። 31 ሄሳ ጊሽ ካሴ “ጨቂዛ አሲ ጎዳን ጨቆ” ጌቴቲ ጌሻ ማፃፍን ፃፌቲዳ ማላ። *

2

ካቁቲዳ ኪርስቶሳ ጊሽ ታማርሶ

1 ታ ኢሻቶ! ታ ኢንቴኮ ያሳ ፁራ ቆንጨሳና ቢዳይ ታስ ዱና ቃራቴሲ ዎይኮ ኤራ ዳሮይ ዲዛ ጊሽ ጊዴና። 2 ታ ኢንቴ ጊዶን ዲዛ ዎዴ ካቁቲዳ ዩሱስ ኪርስቶሳፔ አቲን ሃራ ኤሮንታ ማላ ታ ባጋራ ሙርታዲስ። 3 ታ ኢንቴኮ ዳሮ ዳቡራን፣ ያሻቴሳኒኔ ዳሮ ኮኮራሼ ባዲስ። 4 ታ ቃላይኔ ሳባኮይካ አያና ዎልቃ ቆንጨሴሳንፔ አቲን ጨሞኒኔ ኤራ ዳሮን ጊዴና። 5 ሄሲካ ኢንቴ አማኖይ ያሳ ዎልቃንፔ አቲን አሳ ጨንጫቴሳ ቦላ ፃጵንታ ማላ ሃኒደስ።

* 1:19 ኢሳ 29:14 * 1:20 ኢዮ 12:17፣ ኢሳ 19:12፣ 33:18፣ 44:25

* 1:31 ኤር 9:24

ጊሎ አያናፔ ኢሜቲዳ ኤራቴስ

6 ኑ ካሃ ኩንሲዳ አሳታ አቻን ኤራ ሃሳያ ሃሳዮስ፤ ጊዶ አቲን ሃይሳ ሃ አላሜዛ ኤራቴስ ጊዶና፤ ዎይኮ ዳያና ዲዛ ሃ አላሜዛ ሃሪዛይታ ኤራቴስ ጊዶና። 7 ጊዶ አቲን ኑ ሃሳዩዛይ ካሴ ቆቴቲ ዲዛ ያሳ ፀራ ኤራቴሳ፤ ሄ ኤራቴሳይ ያሲ ዳሮ ዎዶፔ ካሴ ኑና ቦንቾስ ካሴቲዲ ወርሲ ዎሲዳይሳ። 8 ሃ አላሜዛ ሃሪዛይታፔ አኒካ ሃ ኤራቴሳ ኤሪቤና፤ ኤሪዳኮ ኢስቲ ቦንቾ ጎዳ ካቄቴና። 9 ጊዶ አቲን ጌሻ ማፃፋን

“አሳ አይፌይ ቤዮንታዝ።

አሳ ሃይሲ ሲዮንታዝ።

አሳ ዎዝናይካ ቆፖንታዝ

ያሲ ባ ዶሲዛይታስ ጊጊሲዴስ” ጌስ። *

10 ያሲ ጊዲኮ ሄሳ ባ አያና ባጋራ ኑስ ቆንጨሲዴስ። አያናይካ ያሳስ ዲዛ ጨማ ዮዮ አሾንታ ወርሲ ፒልጊ ያሌስ። 11 አሳ ጋርሳን ኢዛዴስ ዲዛ አያናፔ አቲን ኢዛዴ ዎዝና ኤሪዛይ አኔ? ሄሳሶካ ያሳ አያናፔ አቲን ያሳ ቆፋ ኤሪዛይ አኒካ ዴና። 12 ያሳፌ ኑስ ኢሜቲዳይሳ ኑኒ ኤራና ማላ ያሳ አያናይ ኑስ ኢሜቲዴስ አቲን ኑኒ ሃይሳ ሃ አላሜዛ አያና ኤኪቤኮ።

13 ኑ ዮቲዛይ ሃይሳ፤ ኑ አሳፔ ታማሪዳ ቃላ ጊዶንታ አያናፔ ታማሪዳ ቃላ ሃሳዮስ። አያና ቱማቴሳካ ኑ ቆንጨሲዛይ አያና ቃላና። 14 ያሳ አያናይ ኢዛን ባይንዳ አሲ ያሳ አያናፔ ጊዲዳዝ ኤካናስ ዳንዳይና፤ ጋሶይካ ሄሳ ማላ ዮዶይ ኢዛስ ኤዮቴሳ፤ ኢዚ ባሲ አያናን ፓጩቲዛዴ ጊዲዳ ጊሽ ኢዚ ኤራናስ ዳንዳይና።

15 ያሳ አያናይ ኢዛን ዲዛዴይ ቃስ ወርሲካ ፓጩስ አቲን ባሲ አናንካ ፓጩቴና። 16 ሄሲካ

“ጎዳ ቆፋ ኤራናስ ዳንዳይዛይ አኔ?

ኢዛ ዞራናስ ዳንዳይዛይ አኔ?”

ጌቲቲ ካሴ ጌሻ ማፃፋን ፃፌቲዳ ማላ፤ ኑስ ጊዲኮ ኪርስቶሳ ዎዝናይ ዴስ። *

3

ዎሳ ኬላ ጊዶን ሜዴቲዳ ሻኬቴስ

1 ታ ኢሻቶ! ታ ኢንቴና ኢንቴ ኪርስቶሳን ቡሮ ጉላ ናይታ ማላኔ ቡሮ አማኖይ ጌሎንታ አሳ ማላፔ አቲን አያናን ኩሚዳ አሳ ማላ ጋዳ ኢንቴስ ሃሳዮናስ ዳንዳይቤኬ። 2 ኢንቴ ቡሮ ሚኖንታ ጊሽ ታ ኢንቴና ማላ ፓሃዲስ አቲን ቡሮ ሚኖ ካሳ ሚዛቤኬ፤

* 2:9 ኢሳ 64:4 * 2:16 ኢሳ 40:13

ሃዲካ ጊዲኮ ኢንቴ ቡሮኮ! * 3 ኢንቴ ሃዲካ ቡሮ አማኖን ሚኖንታይታ ጊዲዳ ጊሽ ኢንቴ ጊዶን ቃናቴቴሴኔ ፓላማይ ዴስ፤ ሂስቲን ኢንቴ ቡሮ አማኖን ሚኖንታ አሳ ማላ ጊዴኬቲ? ኢንቴ አሶይ ጮ ሜላ አሲ አሲዛይሳ ማላ ጊዴይ? 4 ጋሶይካ ኢንቴ ጋርሳፌ ኢሶይ “ታ ጳጴሎሳሳ” ሃንኮይስ ቃስ “ታ አጲሎሳሳ” ጊኮ ኢንቴ ጮ አሾ ቆፋን ፃላላ ዲዛ አሳ ማላ ጊዴኬቲ? *

5 ኤሮ! ጊዶ አቲን አጲሎሲ አዜ? ጳጴሎሲካ አዜ? ኢስቲ ኅዳይ ኢስታስ ኢሳስ ኢሳስ ኢሚዳ ማላ አሲዛ አሳንቻታ፤ ኢንቴካ ኢስታ ባጋራ አማኒዴታ። 6 ታ ቶካዲስ፤ አጲሎሲ ሃሴ ኡቪዴስ፤ ዲቺዳይ ጊዲኮ ያሳ። * 7 ሄሳ ጊሽ ዲቺዛይ ያሴ አቲን ቶኪዛዴይካ፤ ሃሴ ኡቪዛዴይካ አይኮካ ጊዴቴና። 8 ቶኪዛዴ ጊዲን ዎይኮ ኡቪዛዴ ጊዲን ኢስቲ ኢሲኖ፤ ኢስታፌ ኢሳዴይ ኢሳዴይ ባ አሶ ማላ ዎይቶ ኤካና። 9 ጋሶይካ ኑ ያሳራ ኢሲፌ አሲዛይታ። ኢንቴካ ያሳ ጎሻ ጋዴኔ ያሳ ኬሳታ።

10 ያሳፌ ታስ ኢሜቲዳ ኢሞቴሳ ጊና ኬሴ ኬዪዛ ሂላ ማላ ኬሳይ ኤቃናስ ሎዔሳ ጊጊሳዲስ፤ ኢዛ ቦላ ሃራ አሲ ኬሳ ኬዓና። ጊዶ አቲን ኬሳ ኬዪዛዴይ ዎስቲ ኬዓናኮኔ ናጌታናስ ቤሴስ። 11 ጋሶይካ ኬሳይ ኬዔቴስ አይኬቲዳፕ ጉዬ ሃራ ዎሲ ቃሴ ኬዓና ዳንዳዩዛዴይ አኒካ ባዋ፤ ሄሲካ ኬሳስ ኮይሮይ ዩሱስ ኪርስቶሳ። 12 አኒካ ኬሳይ ኮይሮ ኬዔቲዳይሳ ቦላ ዎርቃን ዎይኮ ቢራን ቦንቼቲዳ ሹቻን ዎይኮ ሚሳኒኔ ማታን ዎይኮ ማቃን ኬዪኮ። 13 ኢዛዴ አሶይ አይ ማላ ፐርዳ ጋላስ ቆንጫና። ጋሶይካ ሄ ጋላሳይ ኢዛ ሃ ፖጋይ ዲዛሶ ኬሳና። ሄ አሶይ ታማን ፓጩታና ጊሽ ኢሳዴ ኢሳዴ አሶይ አይ ማላ ቡሮ ታማን ፓጩታና። 14 አኒካ ኬዪዳ ኬሲ ሚኒ ኤቁዛ ጊዲኮ ሄሳዴይ ባ ዎይቶ ኤካና። 15 ኢዛ አሶይ ፀጌቲዳዴይ ጊዲኮ ዎይቶይ ኢዛስ ዴና ሺን ኢዛዴይ ባ ሁዔስ አታና። ጊዶ አቲን ኢዛዴ አቴሲ ታማፕ አሲ ዋይዲ አቲዛ አቴሳ ማላ ጊዳና።

16 ኢንቴ ኢንቴ ሁዔስ ያሳ ኬሴ ጊዲዳይሳኔ ያሳ አያናይ ኢንቴ ጊዶን ዲዛይሳ ኤሬኬቲ? * 17 አኒካ ያሳ ኬሴ ላሊኮ ያሲ ኢዛዴ ላላና። ያሳ ኬሲ ጌሻ። ሄሲካ ኢንቴናኮ!

18 አኒካ ባርካ ባና ባሎሶፎ፤ ኢንቴፌ አኒካ ሃይሳ ሃ አላሜዛን ባና ኤራንቻ ማላ ቆፐኮ ኢዛዴይ ኤራንቻ ጊዳና ማላ ባና ባርካ ኤያ ማላ ቆዶ። 19 ሃይሳ ሃ ዴሬዛ ኤራቴሲ ያሳ አቻን ኤያቴሳ። ካሴ ጌሻ ማፃፋን “ኢዚ ኤራንቻታ ኢስታ ጌኔ አሶ ጊዶን ዛሪዲ አይካና” ጌቴቲ ፃፌቲዴስ። * 20 ቃሴካ ሃራሶን

* 3:2 ኢብ 5:12-13 * 3:4 1ቆሮ 1:12 * 3:6 ሃዋ 18:4-11፤ 24-28
* 3:16 1ቆሮ 6:19፤ 2ቆሮ 6:16 * 3:19 ኢዮ 5:13

“ኤራንቻታ ቆፋይ

ጫላ ሃዳ ጊዲዳይሳ ጎዳይ ኤሬስ”

ጌቴቲ ሃፌቲዴስ። * 21 ሄሳ ጊሽ ወሪካ ኢንቴስ ጊዲዳ ጊሽ አኒካ አሳን ጩቁቶፎ። 22 ጳውሎሳ ጊዲን፣ አጵሎሳ ጊዲን፣ ዎይኮ ኬፋ ጊዲን፣ አላጫ ጊዲን፣ ዴዎ ጊዲን፣ ዎይኮ ሃይቆ ጊዲን፣ ሃዲ ዲዛዝ ጊዲን፣ ዎይኮ ቡሮ ያና ሚሽ ጊዲን፣ ወሪካ ኢንቴሳ። 23 ኢንቴካ ኪርስቶሳይታ፤ ኪርስቶሲካ ያሳይሳ።

4

ኪርስቶሳ ሃዋሬታ

1 ሄሳ ጊዲዳ ጊሽ አሲ ወሪካ ኑና ኪርስቶሳ አሳንቻታ ማላኔ ያሳ ፀራ ቆንጫሳናስ ሃዳራ ኤኪዳ አሳ ማላ ቆዳናስ ቤሴስ። 2 ሃዳራ ኤኪዳይቲካ አማኔቲዳይታ ጊዳናስ ቤሴስ። 3 ታ ቦላ ኢንቴ ፐርዲንካ ዎይኮ ዱላታ አሳይ ፐርዲንካ ታ ባጋራ ታስ አይኮይ ባዋ። ሃራይ አቶሺን ታርካ ታ ቦላ ፐርዲኬ። 4 “ታ ኤሪዛ ማላ ታኒ ታ ዎዝናራ ሲዲዛ ሚሺ ባዋ፤ ጊዶ አቲን ሄሳ ጉስ ታ ቦላ ሞሮይ ባዋ” ጉስ ጊዴና። ቡሮ ታ ቦላ ፐርዳናይ ጎዳ። 5 ሄሳ ጊሽ ፐርዳና ዎዴይ ጋኮንታ ሃራ አይ ዮዎካ ፐርዶፍቴ። ጎዳይ ያና ጋካናስ ናጊቲ፤ ኢዚ ዱማ ጊዶን ቆቴቲዳይሳ ቡሮ ቆንጩ ኬሳና። አሳ ዎዝና ጊዶን ዲዛ ቆፋካ ቆንጩ ኬሳና። ሄ ዎዴ ኢሲ ኢሲ አሲ ባሲ ቤሲዛ ጋላታ ያሳ አቻፌ ኤካና።

6 ሄሳ ጊሽ ታ ኢሻቶ! ታ ኢንቴና ጎዳና ማላ ሃ ዮዎዛን ታናኔ አጲሎሳ ኢንቴስ ሌሚሶ ሺሻዲስ፤ ታ ሃይሳ አሲዳይ “ሃፌቲዳይሳፌ አጵፋ” ጊዛይሳ ኢንቴ ኑፔ ታሚራና ማላ ጋዳ። ሄሳ ጊሽ ኢንቴ ኢሳዴ ሳቢዲ ሃራ አስ ካዳናስ ቤሴና። 7 ኔኒ አዛን አዳይ? ኔኒ ሃራፔ ኤኮንታ አቲዳ ሚሺ አዜ? ሂስቲን ኔ ወርሳካ ኤኪዳይ ሃራ አሳፔ ጊዲኮ፣ ሃራ አሳፔ ኤኮንታ አሳ ማላ አዛስ ጩቁታይ?

8 ሃዲ ጊዲኮ ኢንቴስ ኮሺዛዝ ኢንቴ ወርሲ ዴሚዴታኔ ዱራቲዴታ፤ ኑፔካ ሻኬቲዲ ካዎቲዴታ። ኢንቴ ቱሙካ ካዎቲዳኮ ኑካ ኢንቴናራ ካዎታናኮ ሺን። 9 ጋሶይካ ያሲ ኑና ሃዋሬታ ኑ ቦላ ሃይቆ ፐርዳይ ፐርዴቲዳ አሳታ ማላ አሳ ኡባፌ ወርሴሴ አሲዳዝ ታስ ሚሳቴስ። ሄሳ ጊሽ አላጫስ ኪታንቻታሲኔ አሳ ኡባስ ካሳ ሚሽ ጊዲዶስ። 10 ኑ ኪርስቶሳ ጊሽ ኤያታ ጊዲዶስ። ኢንቴ ቃስ ኪርስቶሳን ኤራንቻታ፤ ኑኒ ዳቡራንቻታ፤ ኢንቴ ጊዲኮ ሚኖታ፤ ኢንቴ ቦንፔቲዳይታ፤ ኑኒ ጊዲኮ ካወሻታ። 11 ሃኖ ጋካናስ ኑ ጋፎስ፤ ሳሜቶስ፤ ካሎቶስ፤ ቡኬቶስ፤ አቁዛሶይ ዳዩን ዋዩቶስ።

* 3:20 ማዛ 94:11

12 ኑ ኩሼራ አሲ ዳቡሪ አቆስ። ኑና ቃንጊሺን ኑ ቃስ አንጀስ፤ ኑና ጎዲሺን ኑ ዳንዳዮስ። * 13 ኑ ሱንሰ አስቲ ሞሪሺን ኑ ቃስ ሎዖ ዛሮስ፤ ሃኖ ጋካናስ ኑ ቢታፌ ፒቴቲዳ ቡራ ጊዲዶስ።

14 ታ ሃይሳ ኢንቴስ ገፊዛይ ኢንቴና ታ ዶሲዛ ታ ናይታ ማላ ዞራናስ ጋዳ አቲን ኢንቴና ዩላቻናስ ጊዴና። 15 ኢንቴና ኪርስቶሳን ዲቺዛ ዳሮ አሳቲ ዲኮካ ኢንቴስ ዳሮ አዋቲ ዴቴና። ታኒ ቃስ ዩሱስ ኪርስቶሳ ሚሺራቾ ቃላን ኢንቴና ዩላዲስ።

16 ሄሳ ጊሽ ኢንቴ ታና ሚሳታና ማላ ታ ኢንቴና ዎሳይስ።

17 ጎዳን ዳሮ ዶሴቲዳይሳኔ አማኔቲዳ ታ ና ጊምቶሳ ታ ኢንቴኮ ኪቲዳይ ሄሳ ጋሶና። ኢዚካ ዱማ ዱማ ሶን ዲዛ ዎሳ ኬላ አሳ ዉርሲ ታ ታማርሲዳ ቲማርቴዛራ ጋጊዛይሳ ዩሱስ ኪርስቶሳን ዲዛ ዴዖ አጌ ጊሽ ኢንቴና ኢዚ ቆፊሳና።

18 ኢንቴፌ አሲ አሲ አሳቲ ታ ናምዓንሳ ኢንቴና ቤያናስ ቦንታዝ አስታስ ሚሳቲን አቶሬቲዳ። 19 ጊዶ አቲን ጎዳ ሼኔ ጊዲኮ ማታራ ታ ኢንቴኮ ባና። ሄ ባዳ ሄ አቶራንቻቲ ሃሳዩዛዝ ገላላ ጊዶንታ አስታስ አዛ ዎልቃይ ዲዛኮኔ ቤያና ኮያይስ። 20 ጋሶይካ ዎሳ ካዎቴሲ ጮ ዱና ገላላ ጊዶንታ ዱናፔ ቦላራ ዎሳ ዎልቃ።

21 ኤሮ! ኢንቴ ኮዩዛይ አዋይሴ? ዱርቃ ኤካ ቦዬ? ዎይኮ ሲቆራኔ አሽኬቴላ አያናራ ቦ?

5

ዎሳ ኬላን አሴቲዳ ዩላቺዛ ናጋራ

1 ኢንቴ ጋርሳን ዩላቺዛ ላይማይ ዲዛይሲ ዎሬቴስ። ሄሳ ማላ ቱናቴሲ አማኖንታ ዴሬታ አቻንካ ዴና። ባ አዋ ማቾ ኤኪዳ አሲ ኢንቴኮን ዴስ። * 2 ሂስቲን ሄሳ ማላ ዩላቺዛ ሚሺ ኢንቴ ጊዶን ዲሺን አዛስ አቶሬቴቲ? ሄሳፌ ሄ ዮዎዛን ኢንቴ ሙዞታናስ ኢንቴና ቤሴኔ? ሄሳ ማላ አሲዳዴ ኢንቴ ጋርሳፌ ዲጊቴ።

3 ታ ኢንቴናራ አሾን አሲፌ ዶንታ አጊኮካ አያናን ቃስ ኢንቴናራ ዳይስ፤ ታ ሃዒ ኢንቴናራ ዲዛ ማላ ሄሳ አሲዳዴ ቦላ ፒርዳዲስ። 4-5 ኢንቴ ሺቂዛሶን ታ ኢንቴናራ ዲዛ ጊሽ ጎዳ ዩሱሳ ሱንሳኔኔ ኢንቴ ጊዶን ዲዛ ኑ ጎዳ ዩሱሳ ዎልቃን ሄ ሞራንቻዛ አሾይ ዳዩን ኢዛ ሼምፖይ ጎዳ ጋላሳን አታና ማላ ሄሳ ማላ አሲ ገላዔስ አዲ አሜቶ።

6 ኢንቴ ጩቁቲዛይሲ ሎዖስ ጊዴና። ጉላ ኢርሾይ ዳሮ ቡኬሶ ዴንሴሲዛ ኤሬኬቲ? * 7 ኢንቴ ሃዒ ኢርሾይ ባይንዳ አራላ ቡኬሶ ጊዳና ማላ ካሴ ጫላ ኢርሾዛ ኢንቴ ጊዶፌ ዲጊቴ። ኑ ፓዚጋ

* 4:12 ሃዋ 18:3 * 5:1 ዛሬ 22:30 * 5:6 ጋላ 5:9

ዶርስ ጊዲዳ ኪርስቶስ ኑስ ያርሼቲዴስ። ** 8 ሄሳ ጊሽ አኔ ኑኒ ፓዚጋ ባዓሌዛ ቆሆይኔ ኢታቴሲ ኢዛን ኩሚዳ ካሴ ጫላ ኢርሾ ቦላ ጊዶንታ ኢርሾይ ባይንዳ ኡኬላን ሱሬቴሳኒኔ ቱማን ቦንቾስ። *

9 ኢንቴስ ላይማቲዛ አሳታራ ኢሲፌቴሲ ዶንታ ማላ ታ ኢንቴስ ካሴ ዳብዳቤ ዓፋዲስኮሺን። 10-11 ኢንቴ ማላ አማኖንታ ላይማቲዛ አሳራ ጊዶንታ ዎይኮ ጮ ጋጲጋጲዛይታራ፣ ካይሶቲዛይታራ፣ ኤቃስ ጎይኒዛይታራ ጋንፍቴ ጉስ ጊዶንታ ዲሺን ሃዒ ታ ዓፊዳይ አማናይስ ጊሼ ላይማቲዛይታራ ዎይኮ ማሶቲዛይታራ፣ ጋጲጋጲዛይታራ፣ ኤቃስ ጎይኒዛይታራ፣ አሳ ሱንስ ሞሪዛይታራ ዎይኮ ጫይዛይታራ፣ አሳ ሚሽ ቦንቁዛዴንታራ ኢንቴስ ኢሲፌቴስ ዶፖ። ሄይታንታ ማላራ ሃራይ አቶ ሺን ካሲካ ኢሲፌ ሞፕቴ።

12 ሃንኮ አማኖንታ አሳ ቦላ ፐርዳናስ ታና አዚ ጋሴዜ? ዎሳ ኬሳን ዲዛይታ ቦላ ኢንቴ ፐርዴኬቲ? 13 ዎሳ ኬሳፌ ካሬራ ዲዛይታ ቦላ ጊዲኮ ዖሲ ፐርዳና “ኢንቴ ኢንቴ ጊዶፌ ኢታ አስ ዲጊቴ” ጌቴቲ ጌሻ ማፃፋን ዓፌቲዴስ።

6

አማኒዛይቲ ባ ጋርሳን ሞቴታናስ ቤሴና

1 ኢንቴ ጋርሳፌ ኢሳዴስ ሃራ አማኒዛዴራ ዮዖይ ዲኮ ሄ ዮዖዛ አማኒዛይታ አቾ ሺሻናይሳ ዎስቲ አማኖንታ አሳ ሲንሳን ፐርዴታና ሺሺዜ? 2 አማኒዛ አሳይ አማኖንታ አሳ ቦላ ፐርዳናይሳ ኢንቴ ኤሬኬቲ? ኢንቴ ቡሮ አላሜ ቦላ ፐርዳናይታ። ጊዲኮካ ሄሳ ጉሳ ዮዖ ቦላ ፐርዳናስ ዳንዳዩኬቲ? 3 ሃይሳ ቢታ ቦላ ዲዛ ፐርዳይ አቶሺን ኢንቴ ቡሮ ኪታንቻታ ቦላ ፐርዳናይሳ ኤሬኬቲ? 4 ኢንቴ ኢንቴ ጋርሳን አቶቲኮ አማኒዛይታ ማባራፔ ካሬን ዲዛይታኒኔ ካዴቲዳ አሳታ ሲንሳን ዎስቲ ኢንቴ ዮዖ ሺሼቲ? 5 ታ ሄሳ ኢንቴስ ጊዛይ ኢንቴና ዩላቻናሳ። ኢንቴ ጋርሳን አማኒዛይታ ጊጊሳናስ ዳንዳዩዛ ዋዝናማ አሲ ዴኔ? 6 ጊዶ አቲን አማኒዛይይ ሃራ አማኒዛይ ሞታናስ አላሜ ፐርዳ ኬሴ ባናስ ቤሲዜ?

7 ኢንቴ ጋርሳን ኢሶይ ኢሳ ሞቶይ ኢንቴ ኩንዴሳስ ማላታ ቤሴስ። ኢንቴ ቆሃናፔ ቆሄቲኮ ሎዴኔ? ቃሴካ ኢንቴ አስ ባሌሳናፔ ኢንቴና አሲ ባሌሲኮ ሎዴኔ? 8 ኢንቴ ሃ ቆሄታናፔ ጌዴ ቆሄታኔ ባሌሴታ። ሄሲካ ኢንቴ ኢሻታ።

* 5:7 ፓዚጋ ቦንቹዛ ዎዴ አሳይ ጫላ ኢርሾ ጊዲዳ ሚሺ ካሳን ዩጊና። * 5:7 ኬሳ 12:5 * 5:8 ኬሳ 13:7፤ ዛሬ 16:3

9 ማከላንቻቲ ሰላ ካዎቴስ ጌሎንታይሳ ኤሬኬቲ? ሄሳ ማላ ዮዖን ባሌቶፍቴ። ላይማታና ቃቃቲዛይቲ፣ ኤቃ ኤቁዛይቲኔ አዴይ አዴራ ላይማቲዛይቲ፣ 10 ዎይኮ ካይሶቲ፣ ጋጺጋጺዛይቲ፣ ማሶቲዛይቲ፣ አስ ጫይዛይቲኔ ቦንቁዛይቲ ሰላ ካዎቴስ ላቴቴና። 11 ኢንቴፌ ኢሲ ኢሲ አሳቲ ሄይታንታ ማላ ሺን ሃላ ቃስ ጎዳ ዮሱስ ኪርስቶሳ ሱንላኒኔ ኑ ሰላ አያናን ጫጩቲዴታ፤ ዱማቲዴታኔ ባሊዴታ።

ባ አሳቴሳን ሰላ ቦንቾ

12 ሃራይ ወሪካ ታስ ኢሜቲዴስ፤ ጊዶ አቲን ወሪካ ጎሲዛዝ ጊዴና። ወሪካ ታስ ኢሜቲዴስ ጊዶ አቲን አይ ሚሺካ ታና ሃሬና። * 13 ቃሴ ካሲ ኡሎሳ፤ ኡሎይካ ካሳሳ፤ ጊዶ አቲን ሰሲ ናምዓካ ዳይሳና፤ አሳቴሲ ጎዳስፌ አቲን ላይማስ ጊዴና። ጎዳይካ አሳቴሳሳ። 14 ሰሲ ጎዳ ሃይቆፕ ዴንሲዳ ማላ ኑናካ ቃሴ ኢዚ ባ ዎልቃን ሃይቆፕ ዴንሳና።

15 ኢንቴ አሳቴሳይ ኪርስቶሳ አሳቴሳ ቢሊቴ ጊዲዳይሳ ኢንቴ ኤሬኬቲ? ሂስቲን ታ ኪርስቶሳ አሳቴሳፌ ኢሳ ላይማን አቁዛ አሳታራ ኢሲኖ ሂስቶ? ሙሌካ ቤሴና። 16 ዎይኮ ላይማቲዛሪራ አቁዛዴይ ኢዚራ ኢሲ አሾ ጊዲዳይሳ ኢንቴ ኤሬኬቲ? “ናምዓይ ኢሲ አሾ ጊዴቴስ” ጌቴቲዴስ። * 17 ጊዶ አቲን ጎዳራ ኢሲኖ ጊዲዳይይ ኢዛራ ኢሲ አያና ጊዴስ።

18 ላይማፕ ሃኪቴ፤ አሲ አሲዛ ሃራ ናጋራይ ወሪ ኢዛዴ አሾፕ ካሬራ ሃኔስ። ላይማ ላይማቲዛዴይ ጊዲኮ ባርካ ባ አሳቴሳ ቦላ ናጋራ አሴስ። 19 ኢንቴ አሳቴሳይ ኢንቴ ጋሳን ዲዛ ባሎ አያናስ ዱሳሶ ጊዲዳይሳ ኢንቴ ኤሬኬቲ? ሄ አያናይካ ኢንቴ ሰላፌ ኤኪዳይሳ። ኢንቴካ ኢንቴስ ጊዴኬታ። * 20 ኢንቴ ሚሻን ሻሜቲዴታ። ሄሳ ጊሽ ኢንቴ ኢንቴ አሳቴሳን ሰሴ ቦንቹቴ።

7

ኤኮ ጊሺኔ ጌሎ ጊሽ ሺቂዳ አይሾኔ ዛር

1-2 ኢንቴ ታስ ዓሬዳ ማላ አሲ ማጫሳኮ ጋኮንታ አጊዛኮ ሎዎኮ! ጊዶ አቲን ላይማፕ ናጌታናስ አቲማሳስ ኢሳስ ኢሳስ ማቻ ዱ። ማጫሳስካ ኢሲኔይስ ኢሲኔይስ አዚናይ ዶ። 3 አዚናይ ባ ማቼይስ ኮሺዛዝ ወርሲ አሶ። ማቻካ ባ አዚናስ ኮሺዛዝ ወርሳ አሶ። 4 ማቼ አሳቴሲ ኢዚስ ዓላላ ጊዶንታ አዚናሳራ ኮላ። ሄሳሶካ አዚና አሳቴሲ ኢዛስ ዓላላ ጊዶንታ ማቼይሳራ ኮላ። 5 ናምዓይ ዶሳን

* 6:12 1ቆሮ 10:23 * 6:16 ሜዴ 2:24 * 6:19 1ቆሮ 3:16፤ 2ቆሮ 6:16

ዎሳስ ጊዲ ዞሬን ጊደ ጊዲ ቃቸዳ ጋላሳታፔ አቲን ሃራ ጋላስ ኢሶይ ኢሳስ አካይ ጎፒቱ። ሄሳ ጋሶን ኢንቴስ ኢንቴና ሃሮይ ዶን ሃላዔይ ኢንቴና ፓጮንታ ማላ ናምዓይ ኢሲፌ አቂቱ።

6 ታ ሄሳ ጊዛይ ጮ አዛዞ ማላ ጊደንታ ዞሬ ዞራይስ። 7 አሲ ወሪ ታ ማላ ማቾ ኤኮንታ ዲዛኮ ታ ዶሳይስ። ጊደ አቲን ኢሲ ኢሲ አሳስ ዶሳሬ ኢሜቲዳ ዱማ ኢሞታይ ዴስ። ኢሳስ ዱማ ኢሲ ኢሞታይ ዴስ። ሃንኮይሳስ ቃስ ሃራ ኢሞታይ ዴስ።

8 ቡሮ ኤኮንታይታኔ ጌሎንታይታ ጊሽ ቃሴካ አዚናይ ሃይቂዳ ማጫሳታ ጊሽ ታ ጊዛይ ኢስቲ ጌሎንታኔ ኤኮንታ ታ ማላ ዲዛኮ ኢስታስ ሎዶ ጋይስ። 9 ጊደ አቲን ኢስቲ ባና ናጋናስ ዳንዳዮንታይታ ጊዲኮ ጌሌቶኔ ኤኬቶ፤ ጮ አሞን ፀጌታናፔ ኤኮይኔ ጌሎይ ሎዶ።

10 ኤኬዳይታሲኔ ጌሊዳይታስ ታ ኢሚዛ አዛዞይ ሃይሳ። ሄሲካ ጎዳ አዛዞፔ አቲን ታ አዛዞ ጊዴና። አዚና ጌሊዳ ማጫሳያ ባ አዚናፔ ሻኬቱፉ። 11 ሻኬቲዛ ጊዲኮ ሃራ አዚና ጌሎንታ ኡቱ። አካይ ጊኮ ባ አዚናራ ጊጉ። አዚናይካ ባ ማቾ አንጂ ዩዶፎ።

12 ሃንኮ አሳስ ቃስ ታ ሂዝጋይስ። ሄሳ ጊዛይካ ታና አቲን ጎዳ ጊዴና። አማኖንታ ማቻ ዲዛ አማኒዛዴይ ማቼያ ኢዛራ ዳና ዶሲኮ ኢዚ ኢዞ አንጃናስ ቤሴና። 13 አማኖንታ አዚናይ ዲዛ አማኒዛ ማጫሲያ ሄ አማኖንታ አዚናይ ኢዚራ ዳናስ ኮይኮ ኢዛ ኢዛፔ አንጂታ ባናስ ቤሴና። 14 ጋሶይካ አማኖንታ አዚናይ አማኒዛ ባ ማቼዩን አንጂቴስ። አማኖንታ ማጫሳያካ አማኒዛ ባ አዚናን አንጂታወስ። ሄሳሶ ሃኖንታ አጊኮ ኢንቴ ዩሊዳ ናይቲ ቱናታ ጊዳና ሺን ሃዒ ቃስ አንጂቲዳይታ።

15 ጊደ አቲን ናምዓፌ ኢሶይ አማኖንታዴይ ሻኬታና ኮይኮ ሻኬቶ። አዴ ጊዲን ማጫ ጊዲን አማኒዛዴይ ሄሳ ማላ ዎጋን ቃሹቱና። ዶሲ ኑና ሳሮን ዳና ማላ ዪይጊዴስ። 16 ሃኔ ኔኔ ኔ አዚና አሻናኮኔ አይ ኤራይ? ዎይኮ ሃይሶ ኔ ኔ ማቾ አሻናኮኔ አይ ኤራይ?

17 ጮ ኢሲ ኢሲ አሲ ዶሲ ዪይጊዳ ማላኔ ጎዳይ ዎሲዳ ማላ ዴዎ። ዎሳ ኪሳታስ ታ ዎሲዛ ዎጋይ ሄሳ። 18 ኢሳዴይ አማናናፔ ካሴ ቃፃሬቲዳዝ ጊዲኮ ቃፃሬቶንታ አሳ ማላ ሃኖፖ። ቃስ ቃፃሬቶንታ ዲሼ አማኒዳዴይካ ቃፃሬቶፎ። 19 ቃፃሬቲን ቃፃሬቶንታ አጊን ናምዓንካ ጎዳይ ባዋ። ዋና አይፌ ዮዶይ ዶሳ አዛዞ ፖሎ። 20 ኢሲ ኢሲ አሲ ባ ዪይጌቲዳ ዪይጌቲሳን ሚኒ ዴዎ። 21-22 አማኒዛ ዎዴ ኔ አይሌ? ኔ ሄሳስ ዳሮ ሜቶቶፓ፤ ዎዜታና ዳንዳዩኮ ዎዜታ። ጋሶይካ አይሌ ጊዲ ዲሼ ጎዳ አማኒዳዴይ ኢዚ ጎዳ ጎቃ። ሄሳሶካ አማኒዛ ዎዴ ጎቃ ጊደንታዴይ ኢዚ ኪርሰቶሳስ አይሌ። 23 ኢንቴ ሚሻን ሻሜቲዴታ። ሄሳ ጊሽ አሳ

አይሌ ጊደፒቱ። 24 ታ ኢሻቶ! ኢንቴፌ ኢሲ ኢሲ አሲ ባ
ጌይጌቲዳ ማላ ያሳራ ሚኒ ዴያ።

ጌላዎታ፣ ፓንሳታኔ አምዔታ ጊሽ ሺቂዳ አይሾ

25 ጌላዎታኔ ፓንሳታ ጊሽ ታስ ጎዳፔ ኢሜቲዳ አዛዞይ ዴና።
ጊዶ አቲን ጎዳ ማሮቴሳፌ ዴንዲዳይሳን ታ ኢንቴስ አማኔቲዳዴ
ጊዳዳ ኢንቴና ዞራይስ። 26 ሃይሳ ሃሲ ዎዴ ሜቶ ጋሶን ኢንቴ
ሃሲ ዲዛ ማላ ዲዛኮ ታስ ሎዎ ሚሳቴስ። 27 ኔ ማቺዳዴ ጊዲኮ
አንጃናስ ኮዮፓ። ማቾንታዴ ጊዲኮ ማቾ ኤካናስ ኮዮፓ። 28 ማቾ
ኤኪኮካ ናጋራ ጊዴና። ጌላዎያካ ጌሊኮ ናጋራ ጊዴና። ጊዶ አቲን
ኤኪዛ አሳታኔ ጌሊዛይታ ቦላ ሃይሳ አላሜዛን ኢስታ ዳሮ ሜቶይ
ጋካና። ታ ቃስ ሄሲ ኢንቴ ቦላ ጋኮንታ አጋናይሳ ዶሳይስ።

29 ታ ኢሻቶ! ታ ቆፋይ ሃይሳ ማላ፤ ዎዴዚ ቃንስ ጊዲዳ ጊሽ
ማቻ ዲዛዴይ ማቻ ባይንዳዴ ማላ ዴያ። 30 ዩኪዛይቲ ዩኮንታ
አሳ ማላ፣ ኡፋይቲዛይቲ ኡፋይቶንታ አሳ ማላ ጊዴቶ። ሚሼ
ሻሚዳዴንቲ ሻሚቲዳ ሚሻ ባስ ጊ ቆፓፌቶ። 31 ሃይሳ አላሜዛ
ሚሻን ጎዔቲዛይቲ ወርሲ ጎዔቶንታ አሳ ማላ ጊዲ ዴቶ። ጋሶይካ
ሃይሳ አላሜዛ ሃኖይ አዳናስ ዴስ።

32 ኢንቴ ሂርጋይ ባይንዳ ዳና ማላ ታ ኮያይስ። ማቾንታዴይ
ጎዳ ኡፋይሳናስ ጎዳ ጊሽ ቆፕስ። 33 ማቺዳዴይ ቃስ ባ ማቺዮ
ኡፋይሳናስ ሃይሳ አላሜዛ ሚሽ ቆፕስ። 34 ሃይሳን ኢዛ ቆፋይ
ናምዑ ኬዚ ሻኬቴስ። ጌሎንታ ማጫሳያ ዎይኮ ጌላዎያ ጎዳዝ
ፃላላ ቆፓወስ። ኢዚስ ጊታ ቆፋይካ አሾኒካ፣ አያናንካ ጎዳስ
ዱማቴሳ። ጌሊዳራ ጊዲኮ ባ አዚና ኡፋይሳናስ ሃይሳ አላሜዛ ሃኖ
ፃላላ ቆፓወስ።

35 ታ ሄሳ ጊዛይ ኢንቴስ ሎዓናዝ ቆፓዳፔ አቲን ኢንቴና ዳሮ
ቆፋን ዩጋናስ ጊዴና። ታስ ጊታ ቆፋይ ኢንቴ ዎዝናይ ሻኬቲ
ናምዑ ኬዞንታ ኢንቴ ጎዳን ሚኒዲ ዎጋራ ዴገያናሳ።

36 ኢሳዴይ ባ አይቺዳ ጌላዎዮ ዎጋራ አይኮንታ አጊኮ ኢዚ
ዎዴይካ ጪሚ ጪሚ ቢኮ ኤካና ኮይኮ ባ ኮይዳ ማላ ኤኮ። ኤኪኮኔ
ጌሊኮ ሎዎ። ናጋራ ጊዴና። 37 ጊዶ አቲን ሃይሳ ሃ ዮዎዛን ኢዛ
ዎዝናይ ቃዎንታ ባና ሃሪዲ ጌላዎዮ ኤኪኬ ጊዲ ሙርቲዳ አሲ
ሎዎ አሲዴስ። 38 ሄሳ ጊሽ ጌላዎዮ ኤኪዳዴይ ሎዎ አሲዴስ።
ኤኮንታዴይካ አጴሳ ሎዎ አሲዴስ።

39 ኢሲ ማጫሲ አዚናይ ፓፃ ዲዛ ዎዴ ኩሜሳን ባ አዚናራ
ቃሼታዱስ። አዚናይ ሃይቂኮ ባ ኮይዳ አስ ጌላና ዳንዳያወስ።
ኢዛ ጌላናዴይ አማኒዛዴ ጊዶ አቲን ጌሎ። 40 ታ ቆፋ ማላ ጊዲኮ
ኢዛ ጌሎንታ ዲዛኮ ዳሮ ኡፋይሳን ዴዓንዱስ። ታስካ ታናን ዶሳ
አያናይ ዲዛ ሚሳቴስ።

8

ኤቃስ ያርሼቲዳ አሾ ሙሳ ጊሽ

¹ ኤቃስ ሹኪቲዳ አሾ ጊሽ ኢንቴ ታስ ገሬዳይሳ ማላ ጊዲኮ ቱሙካ ኑ ወሪካ ኤሪዛ ሚሺ ደስ። ኤሮይ ኦቶሪሴስ፤ ሲቆይ ቃስ ጎዔስ። ² ታ ኤራይስ ጊዛ አሲ ኤራናስ ቤሲዛ ማላ ቡሮ ኤሪቤና።

³ ሆሴ ሲቁዛደይ ጊዲኮ ኢዚ ሆሳ አቻን ኤራቲዳዴ።

⁴ ሄሳ ጊሽ ኤቃስ ያርሼቲዳ አሾ ሙሳ ጊሽ ታ ኢንቴስ ጊዛይ ሃይሳ አላሜዛን ኤቃይ ሃዳ ጊዲዳይሳኔ ኢሲ ሆሳፌ አቲን ሃራ ሆሲ ባይንዳይሳ ኑ ኤሮስ። ⁵⁻⁶ አይዴካ ጊዲኮ ዳሮ ኤቃቲኔ ዳሮ ጎዳቲ ዴቴስ ሺን ሳሎን ጊዲን ሳዓ ቦላ ሆሴ ጌቴቲዛ ዳሮ ኤቃቲ ዲኮካ ኑስ ጊዲኮ ሃኒዳይ ወሪካ ኢዛን ሃኒዴስ። ኑካ ኢዛስ ጊዲዳ ኢሲ ሆሲ አዋይ ደስ። ቃሴካ ሃኒዳዚ ወሪካ ኢዛን ሃኒዳይ ኑካ ኢዛን ሃኒዳ ኢሲ ጎዳይ ዩሱስ ኪርስቶሲ ገላላ ኑስ ደስ።

⁷ ጊዶ አቲን ሄሳ አሲ ወሪ ኤራና። ኢሲ ኢሲ አሳቲ ሃኖ ጋካናስ ኤቃ ጎይኖ ዶሲዳ ጊሽ ሄሳ ማላ አሾ ሚሼ አዳካ ኤቃስ ሹኪቲዳይሳ ቆፕቴስ። ኢስታስ ቆፋይ ላፋ ጊዲዳ ጊሽ ኢስቲ ቱቴቴስ። ⁸ ጊዶ አቲን ካሲ ኑና ሆሳ አቸ ጋሴና። ኑ ዋንታ አጊኮካ ኑስ ፓጩዛይ ዴና። ኑ ሚኮካ ኑስ ሆዴይ ዴና።

⁹ ጊዶ አቲን ኢንቴ ሜቶይ ባዋ ጉሳን አሲዛይስ አማኖን ሚኖንታ አሳስ ዱዴ ጊዶንታ ማላ ናጌቲቴ። ¹⁰ ኔስ ሄሳ ሚሳቲዛ ኤራቴስ ዲዛ ጊሽ ሂንኮ አማኖን ሚኖንታዴይ ኤቃ ኬሳን ኔ ሚዛይሳ ቤዱዲ ኤቃስ ሹኪቲዳይሳ ማናስ ገሌኔ? ¹¹ ሄሳ ጊሽ ኪርስቶሲ ኢዛ ጊሽ ሃይቂዳ ሄ አማኖን ሚኖንታ ኢሻይ ኔ ኤራቴሳ ጋሶን ዳዩስ ጉሳ። ¹² ሄሳሶካ ኢንቴ ኢንቴ ኢሻታ ቆሆኒኔ ኢስታ ላፋ ቆፋ ማዱንሶን ኪርስቶሳ ቆሄታ። ¹³ ሄሳ ጊሽ ታ ሚዛ ሚሺ ታ ኢሻ ዱዲዛዝ ጊዲኮ ታ ኢሻ ታ ዱዴሶንታ ማላ ሙሌካ አሾ ሚኪ።

9

ሃዋሬታስ ዲዛ ማታ

¹ ታኒ ጎቃ አስ ጊዲኪና? ታ ሃዋሬ ጊዲኪና? ኑ ጎዳ ዩሱሳ ታኒ ታ አይፌራ ቤያቤኪና? ኢንቴካ ጎዳን ታ አሶን ቤቲዳ አይፌ ጊዴኪቲ? ² ሃራታስ ታ ሃዋሬ ጊዶንታ አጊኮካ ታ ኢንቴስ ቱማፕ ሃዋሬ። ጋሶይካ ጎዳን ታ ሃዋሬቴሳ ቤሲዛ ማታሜይ ኢንቴና።

³ ታና ፓጩዛይታስ ታ ኢሚዛ ማልሴይ ሄሳ። ⁴ ኤሮ! ማናሲኔ ኡያናስ ኑስ ቤሴኔ? ⁵ ሃራ ሃዋሬታ ማላ ጎዳ ኢሻታ ማላኔ ኬፋንታ ማላ ኑካ አማኒዛ ኑ ማፔታ ኤኪ ዩያና ዳንዳዮኮኒ? ⁶ ሆይኮ ዋዩቲ ዳቡራዲ ዳናስ ቤሲዛይ ታናኔ ባርናባሳ ገላላ?

7 ኤሮ! ባ ሚሻራ ዎታዳራቴስ አሲዛይ አኔ? ዎይኔ ሚሲ ቶኪዲ፣ ሄ ቶኪዳ ሚሳ አይፌ ሞንታይ አኔ? ማሄ ሄሚሼ ባ ሄሚዛ ማሄ ማላ ኡቶንታይ አኔ?

8 ታ ሃይሳ ጊዛይ ጮ አሳ ቆፋ ማላ ባላላ? ሙሴ ዎጋይ ሄሳሶ ጌኔ? 9 ሙሴ ዎጋ ጋርሳን “ካስ ቡኪዛ ማሄ ዱና ቃቾፋ” ጌቴቲ ሃፌቲደስ። ሂስቲን ሶሴ ሜቲዳይ ሄ ማሄዛ ቃንሴ? * 10 ኢዚ ሄሳ ጊዳይ ቱማፕ ኑ ጊሽ ጊደኔ? ሄሲ ሃፌቲዳይ አዳፌ ኑ ጊሻሳ። ጎሻንቻይኔ ቃሴካ ቡኪዛይሲ ባ አሶ አይፌፕ ባና ጋኪዛይሳ ኤካናስ ኡፋይስ አሴስ።

11 ኑ ኢንቴ ጊደን አያና ዜሬሲ ዜሪዳይቲ አሾስ ጊዲዛዝ ማዒኮ ሄሲ ጊታ ሚሼ? * 12 ሃራ አሳቲ ኢንቴፌ ሄሳ ማላ ጎጎ ኤካናስ ዳንዳይኮ ኑ ቃስ ሄሳፌ ዳሮ ደማናስ ቤሴኔ? ጊደ አቲን ኑኒ ኑስ ቤሲዛ ማላ ጎጌቲቤኮ። ሃራፕካ ኑ ኪርስቶሳ ሚሼራቾ ቃላስ ዱጴ ጊደንታ ማላ ሃሂዛዝ ዉርሲካ ዳንዳዮስ። 13 ሶሳ ኬሳን አሲዛይቲ ባ ማናይሳ ሶሳ ኬሳፌ ኤኪዛይሳ ማላ ያርሾሶን አሲዛይቲካ ሄ ባ አሲዛ ያርሼዛይሳፌ ሚዛይሳ ኢንቴ ኤሬኬቲ? * 14 ሄሳሶካ ሚሼራቾ ቃላ ሳባኪዛይቲ ባሲ ኮሺዛይሳ ሚሼራቾ ቃላ አሲዛሶፕ ኤካና ማላ ጎዳይ ዎጋ ዎሲደስ። *

15 ታኒ ጊዲኮ ሄሳ ኡባፌካ አይኮካ ጎጌታቤኬ። ሃሂካ ታ ኢንቴስ ሃይሳ ሃፌዛይ ሄይታንታ ማላ ሚሽ ታስ አሴቶ ጋዳ ጊደና። አይሲ ጊኮ አኒካ ታኒ ታ ጎዳን ጩቁቲዛሮ ታፕ ዎሲ ኤካናፕ ታስ ሃይቆይ ሎዎ። 16 ሚሼራቾ ቃላ ሳባኪዳይሲ ታና ጩቁሴና። ታ ሳባኪዛይ ደሳን ጊዲዳ ጊሽ ጊደንታ ዎልቃራ ታና ጋኪዳ ጊሻሳ። ታ ሚሼራቾ ቃላ ሳባኮንታ አጊኮ ታና አይ-አና! 17 ሚሼራቾ ቃላ ታ ደሳን ታ ሳባኪኮ ታስ ዎይቶይ ደስ። ታኒ ታ ደሳን ጊደንታ ዎልቃራ አሲዛይሳ ጊዲኮ ሃዳራ ፖላና ማላ አሶ ባላላ ጊዳና። 18 ሂስቲን ታስ አዛ ዎይቶይ ዲዜ? ታስ ዎይቶይ ዳናይ ሚሼራቾ ቃላ ሳባካሼ ታስ ቤሲዛይታ ታ ጎጌቶንታ አጊኮኮ።

19 ታ ጎቃፕ አቲን አናስካ አይሴ ጊዲኬ። ጊደ አቲን ዳሮታ ጎዳኮ ዛራና ጊሽ አሳ ኡባስ አይሴ ማላ ጊዳዲስ። 20 አይሁዳታ አሻናስ አይሁዳታራ ኢስታ ሚሳታዲስ። ታኒ ታ ባጋራ ሙሴ ዎጋፕ ጋራሳራ ጊደንታ ዳሼ ሙሴ ዎጋፕ ጋርሳራ ዲዛይታ አሻናስ ኢስታ ሚሳታዲስ። 21 ታኒ ታ ባጋራ ሶሳ ዎጋይ ዲዛደኔ ኪርስቶሳ ዎጋስ ሃራቲዛዴ ጊዲኮካ ዎጋይ ባይንዳይታ አሻናስ ኢስታ ማላ ዎጋይ ባይንዳዴ ጊዳዲስ። 22 ዳቡራንቻታ አሻናስ ጋዳ ታካ ዳቡራንቻታራ ኢስታ ማላ ዳቡራንቻ ጊዳዲስ። ታስ

* 9:9 ዛሬ 25:4፤ 19:፱ 5:18 * 9:11 አሮ 15:27 * 9:13 ዛሬ 18:1 * 9:14 ማቶ 10:10፤ ሉቃ 10:7

ዳንዳዮቲዳ ማላ ኡባን ኢሲ ኢሲ አሳታ አሻናስ አሳ ኡባራ ኢስቲ ሃኒዛዝ ሃናዲስ። 23 ታ ሃይሳ ወርሳ አሲዛይ ሚሺራቾ ቃላ አንጆ ኢስታራ ጊሼታናስ ሚሺራቾ ቃላ ጊሽ አሳዲስ።

24 ጋዴ ዎሲ ዎሊዛይቲ ዳሮ ሺን ያኒዲ ሺልማቴ ዴሚዛይ ኢሳዲ ሃላላ ጊዲዳይሳ ኢንቴ ኤራኬቲ? ሄሳ ጊሽ ሺልማቴ ኤካናስ ዎሊዛይ ማላ ኢንቴካ ዎሊቴ። 25 ጋዴን ዎሊ አዳናስ ጊጌቲዛዴይ አኒካ ሃኖ ባርካ ባና ናጌስ። ሄይታንቲ አዳናኔ ዳያና አክሊሌ ኤካናስ ዳቡሬቴስ ሺን ኑ ቃስ ሜርናስ ዳዮንታ አክሊሌ ዴማናስ ዳቡሮስ። 26 ሄሳ ጊሽ ታ ቃስ ፖሎይ ባይንዳ ጮ ሜላ ዎሊዛይ ማላ ዎሊኬ። ቃሴካ ጫርኮራ ባዬቲዛይ ማላ ጮ ሜላ ጋዴን ባዬቲኬ። 27 ታ ቃስ ሃራታስ ሳባካ ፔዓዳ ታስ ኩንዳ አቶንታ ማላ ታ አሳቴስ ሺሻ አይካዳ ሃራይስ።

10

ኢስራዔሌ ናይታ ቦላ ጋኪዳይሲ ጋኮንታ ማላ ናጌቴስ

1 ታ ኢሻቶ! ካሴ ኑ አዋቲ ሻራይ ኢስታፊ ቦላራ ጊዲዲ ካሌሲዳይሳ ማላኔ ኢስቲ ወሪካ ዞዎ አባ ፒኒዳይሳ ታ ኢንቴና ቆፒሳናስ ኮያይስ። * 2 ኢስቲ ሙሴራ ጊዳናስ ጊዲ ሻራኒኔ አባን ሃማቄቲዳ። 3 ወሪካ ኢሲ አያና ቁማ ሚዳ። * 4 ወሪካ ኢሲ አያና ኡሺ ኡዬዳ። ኢስቲ ኡዬዳይካ ባና ካሊዛ አያና ዛላፌ ፑልቲዳይሳፌ። ሄ ዛላይካ ኪርስቶሳ። * 5 ጊዶ አቲን ያሲ ዳሮታን ኡፋዮቲቤና። ሄሳ ጊሽ ኢስታ አሃይ ባዞን ኩንዲ አቲዴስ። *

6 ኢስቲ ኢታ ሚሽ አሞቲዳይሳሶ ኑካ አሞቶንታ ማላ ሄ ኢስታ ሃኖይ ኑ ናጌታና ማላ ኑስ ሌሚሶ ጊዲዴስ። * 7 “ዴሬይ ማናሲኔ ኡያናስ ኡቲዴስ፤ ዩ-ዮናስካ ዴንዲዴስ” ጌቴቲ ካሴ ጊሻ ማፃፋን ፃፌቲዳ ማላ ኢስታ ጋርሳፌ ኢሲ ኢሲ አሳቲ አሶይሳሶ ኢንቴካ ኤቃ ጎይኒዛያታ ጊዶፒቴ። * 8 ኢስታ ጋርሳፌ ኢሲ ኢሲ አሳቲ ላይማቲዲ ኢሲ ጋላስ ናምዑ ታማኔ ሄዡ ሺ አሳይ ዲፒ ጊ ወርይሳሶ ወሮንታ ማላ ኑካ አኔ ላይማቶኮ። * 9 ኢስታ ጋርሳፌ ኢሲ ኢሲ አሳቲ ጎዳ ፓጩዲ ሽሻን ዱኬቲ ሃይቂ ዳዩዳይሳ ማላ ኑካ አኔ ጎዳ ፓጮኮ። * 10 ኢስታ ጋርሳፌ ኢሲ ኢሲ አሳቲ ዙዙሜቲዲ ዳይሲዛ ቦሻ ኪታንቻን ዳዩዳይሳሶ ኢንቴካ ዳዮንታ ማላ ዙዙሞፒቴ። *

* 10:1 ኪሳ 13:21-22፤ 14:22-29 * 10:3 ኪሳ 16:35 * 10:4 ኪሳ 17:6 * 10:5 ታይ 14:29-30 * 10:6 ታይ 11:4 * 10:7 ኪሳ 32:6 * 10:8 ታይ 25:1-18 * 10:9 ታይ 21:5-6 * 10:10 ታይ 16:41-49

11 ሄሲ ወራ ኑስ ሎሚሶ ጊዳና ማላ ኢስታ ቦላ ጋኪዴስ።
 ዎዴ ወርሴሳን ዲዛ ኑስ ቲሚርቲ ጊዳና ማላ ኑስ ገፌቲዴስ።
 12 ሄሳ ጊሽ ታ ሚና ኤቃ ዳይስ ጊዛዴይ ዲኮ ኩንዶንታ ማላ
 ባሲ ናጌቶ። 13 አሳ ቦላ ጋኪዳ ፓጩፔ ሃራ አዲዛ ፓጩይ
 ኢንቴ ቦላ ጋኪቤና። ያሲ አማኔቲዛ ያሴ ጊዲዳ ጊሽ ኢንቴ
 ዳንዳዮንታ ኢንቴ ዎልቃፌ ቦላራ ኢንቴ ፓጩቴና ማላ ኢዚ
 ኢንቴና አጋጌና። ጊዶ አቲን ኢንቴ ፓጩቲዛ ዎዴ ሄ ፓጩዛ
 ኢንቴ ዳንዳዮና ማላ ዎልቃ ኢሚዲ ፓጩፔ ኢንቴ ኬሲ ኤካና
 አጌ ኢዚ ኢንቴስ ጊጊሳና።

ኤቃራ ኢሲፌቴሳ ዳናስ ቤሴና

14 ሄሳ ጊሽ ታ ሲቆቶ! ኤቃስ ጎይኖፐቴ፤ ኢዛፔ ሃኪቴ። 15 ታ
 ኢንቴስ ሃይሳ ጊዛይ ዎዝናማ ጊዲዳ ጊሻሳ። ሄሳ ጊሽ ታ ዮቲዛይሳ
 አኔ ኢንቴ ኢንቴርካ ፐርዲቴ። 16 ኑኒ ያሳ ጋላቲዲ ኤኪዛ ኡሻይ
 ኪርስቶሳ ሱሳራ ጋንቴሳ ዲዛይሳ ጊዴኔ? ሄሳሳካ ኑ ባሳ ባሳ
 ጊሼቲ ሚዛ ኡኬሳይ ኪርስቶሳ አሾራ ጋንቴሳ ዲዛይሳ ጊዴኔ? *
 17 ኡኬሳይ ኢሲኖ ጊዲዳ ማላ ኑኒካ ዳር ጊዲ ኡቲዲካ ወራካ
 ኢሲ አሾ። ኑ ወራካ ኢሲ ኡኬሳዛ ጊሼቲ ሞስ።

18 አኔ ኢንቴ ኢሲራጌሌ ናይቲ አሲዳይሳ ቆፐቴ። ሽቅዛ
 ያርሾዛፔ ሚዛይታስ ያርሾይ ሽቅዛሶራ ጋንቴሳ ዴኔ? * 19 ሂስቲን
 ኤቃስ ያርሼቲዳ ያርሾ ጊዲን ዎይኮ ኤቃይ ባ ባጋራ ጎሃራ ዴስ
 ጋዘና? 20 ጊዴና! አማኖንታ አሳይ ሽሺዛ ያርሾይ ያሳስ ጊዶንታ
 ገላዔሳ። ኢንቴስ ገላዔራ ኢሲፌቴሳ ዳና ማላ ታ ኮዩኪ። *
 21 ገላዔ ኡሺኔ ጎዳ ኡሺ ኢንቴ ኢሲፌ ጋሳ ኡያና ዳንዳዮኬታ።
 ጎዳ ማዳፌኔ ገላዔ ማዳፌ ጋሳ ማና ዳንዳዮኬታ። 22 ኑኒ ጎዳ
 ሃንቴሲኖ? ኑ ኢዛፔ ሚኒዞኒ? *

ኡባካ ያሳ ቦንቾስ አሶ

23 ወራካ ታስ ኢሜቲዴስ ሺን ወራካ ታና ጎሲዛዝ ጊዴና።
 ወራካ ታሳ ሺን ወራካ ታና ማዴና። * 24 አሲ ወራካ ባ ላጌ
 ጎሃናዝ ጋሳ ዪሎ አቲን ባና ጎሃናዝ ገላላ ኮዮፖ።

25 ጊያን ባይዜቲዛ አሾ ወርሲ ሲዴይ ባይንዳ ሚቴ።
 26 ቢታይኔ ቢታ ቦላ ዲዛይ ወራካ ጎዳይሳ።

27 አማኖንታ አሲ ኢንቴና ባሶ ዪይጊዲ ሽሺዳ ካስ ወርሲ
 አይኮካ ሲዶንታ ሚቴ። 28 ጊዶ አቲን ኢሳዴይ “ሃይሲ ኤቃስ
 ያርሼቲዳ ካሳ” ጊኮ ሄ ካሳ ሄ አዴዛ ቆፋ ጊሺኔ ኢንቴና ሲዲሲኮ

* 10:16 ማቶ 26:26-28፤ ማር 14:22-24፤ ሉቃ 22:19-20 * 10:18 ሌዌ 7:6
 * 10:20 ዛሬ 32:17 * 10:22 ዛሬ 32:21 * 10:23 1ቆሮ 6:12

ሞፐቴ።²⁹ ታ ኢንቴስ ሄሳ ጊዛይ ሄ ዮቴዳዴ ቆፋ ጊሽ ጋዲስ አቲን ኢንቴ ቆፋ ጊሽ ጋቤይኬ። ታ ዊሎ ጊዳ ዲሺን አዛስ ሃራ አሳ ቆፋ ጊዶን ታ ቦላ ፐርዴቴዜ?³⁰ ታ ያሴ ጋላታዳ ሚዛዴ ጊዳ ኡታዳ አዛስ ሃራ አሳን ፐርዴቶ?

³¹ ሂስቴኮ ኢንቴ አይ ሚኮካ፣ አይ ኡዩኮካ ዎይኮ አይኮ አሲኮ ዉርሲካ ያሳ ቦንቾስ አሲቴ።³² አይሁዳ አሳስ ጊዲን አይዛቤታስ ጊዲን ዎይኮ ያሳ ዎሳ ኬሳስ አናስካ ጳጳ ጊዶፐቴ።³³ ታ አስ ዉርሳካ አይ አጌራካ ኡፋይሳና ኮዩዛ ማላ ኢንቴካ ሄሳሶ አሲቴ። ዳርቴ አታና ማላ ታ ታና ጎዲዛዝ ጊዶንታ ኢስታ ጎዲዛዝ ኮያይስ።

11

1 ታኒ ኪርስቶሳ ሚሳታዳ ኢዛ ካሊዛይሳሶ ኢንቴካ ታና ሚሳቲዲ ካሊቴ። *

የሳ ጎይኖ ዎጋ

2 ኢንቴ ታስ ዉርሲ ቆፐዛ ጊሺኔ ታፔ ኤኪዳ ቲሚርቴዛ ሎዔሲ አይኪዳ ጊሽ ታ ኢንቴና ጋላታይስ።³ ጊዶ አቲን ታ ኢንቴ ኤራና ማላ ኮዩዛይ አቱማሳስ ኡባስ ሁዔይ ኪርስቶሳ ጊዲዳይሳ ማላ አቱማሳይ ማጫሳስ ኡባስ ሁዔ። ቃሴ ያሲ ኪርስቶሳስ ሁዔ።⁴ ባ ሁዔ ጉሉንቲዲ ያሴ ዎሲዛዴ ዎይኮ ቃላ ዮቴዛዴይ አኒካ ባርካ ባና ካዉሺስ።

⁵ ባ ሁዔ ጎዞንታ ዎሲዛ ማጫሲያ ዎይኮ ቲንቢቴ ቃላ ዮቴዛ አይ ማጫስካ ባርካ ባና ካዉሻዉስ። ሄሲ ኢዛ ባ ሁዔ ቡሊሲዳዴራ ጊና።⁶ ማጫሲ ባ ሁዔ ጎዞንታ አጊኮ ሜዴቱ ዎይኮ ቃንዲሱ። ኢዚስ ባ ሁዔ ሜዴቴሲ ዎይኮ ቃንዲሴሲ ዮላቺዛዝ ጊዲኮ ጎዞ።⁷ አዴይ ባ ሁዔ ጉሉንታናስ ቤሴና። አቱማሲ ያሳ ሌሚሶኔ ያሳ ቦንቾ። ማጫሲ ጊዲኮ አዴስ ቦንቾ። *⁸ ጋሶይካ ማጫሲ አዴፌ ሜዴታዱስ አቲን አቱማሲ ማጫሳፔ ሜዴቴቤና።⁹ ቃሴካ ማጫሲ አዴስ ሜዴታዱስ አቲን አዴይ ማጫሳስ ሜዴቴቤና።¹⁰ ሄሳ ጊሽ ኪታንቻቴ ቤያናስ ናጊዛ ማጫሳስ ኢሜቲዳ ማታ ቤሲዛ ጎሴ ባ ሁዔን ጎዞ።

¹¹ ጎዳ አቻን ጊዲኮ ማጫሲ አዴይ ባይንዳ፣ አዴይካ ማጫሲ ባይንዳ ዴዮቴና።¹² ማጫሲ አዴፌ ቤቴዳይሳሶ አዴይካ ማጫሳፔ ዮሌቴስ። ጊዶ አቲን ናምዳይካ ያሳፌ ቤቴዳ።

¹³ ማጫሲ ባ ሁዔ ጎዞንታ ያሴ ዎሳናስ ቤሲዛኮኔ አኔ ኢንቴ ፐርዲቴ።¹⁴ አቱማሲ ባ ሁዔ አዱሲ ዲቺኮ ቦርሶ ጊዲዳይሳ ኢንቴና ሜዴቴላ ሃኖቴሲ ኤሪሱዌ?¹⁵ ማጫይ ጊዲኮ ባ ሁዔ

* 11:1 1ቆሮ 4:16፣ ፒሊ 3:17 * 11:7 ሜዴ 1:26-27

1 ቆሮንቶሴ 11:16 17 1 ቆሮንቶሴ 11:34

ቢናና ዲቺኮ ሄሲ ኢዚስ ቦንቾ ጊዴኔ? ኢዚስ አዱሳ ሁዔ ቢናናይ ኢሜቲዳይ ሴሎ ጊዳናሳ። 16 ሄሳ ጊሽ አኒካ ሃይሳ ሃ ዮዮዛን ፓላሜታና ኮይኮ ኑስ ጊዲንካ ያሳ ያሳ ኬሳታስ ሃይሳ። ሃራ ዎጋይ ዴና።

ጎዳ ካዎ ኤኮ ዎጋ

17 ኢንቴ ኢሲ ሶ ሺቁቲዛ ዎዴ ቆሆስ አቲን ጎዳስ ጊደንታ ጊሽ ታ ሃይሳ አዛዛዛ ኢንቴስ አሲዛይ ኢንቴና ጋላታሼ ጊዴና። 18 ኢንቴ ዎሳ ኬሳን ሺቁዛ ዎዴ ኢንቴ ጋርሳን ሻኮቴሲ ዲዛይሳ ታ ካሴታ ሲያዲስ። ታ ሲዮይሳፊ ባጋይ ቱሙ ጊዳናይሳ ታ አማናይስ። 19 ኢንቴ ጊደፊ ቱማንቻቲ ሻኬቲ ኤሬታና ማላ ሄሳ ማላ ሻኮይ ኢንቴ ጊደን ዳናይሲ ዶሳ ጊዴና። 20 ኢንቴ ኢሲፊ ሺቁቲዲ ሚዛይ ጎዳ ካዎ ጊዴና። 21 ኢንቴ ሺቁቲዲ ኢሶይ ኢሳ ናንንታ ዲሼ ካሳ ሜታ። ኢንቴፊ ኢሳዴይ ጋፋን ዲሺን ሃንኮይሲ ቃስ ማሶቴስ። 22 ሂስቲን ኢንቴስ ኡያናሶይኔ ማናሶይ ባዌ? ዎይኮ ያሳ ኬሴ ሴቁዲ አይኮይካ ባይንዳይታ ዮላቸቲ? ሂስቲን ታ ኢንቴና አይ ጎ? ሃይሳ ሃ ሃኖዛስ ኢንቴና ጋላቶ? ሙሌካ ጋላቲኬ።

23-24 ታ ጎዳፕ ኤኪዳይሳ ኢንቴስ አሳዲስ። ሄሲካ ጎዳ ዮሱሲ አዲ ኢሜቲዳ አማርስ ኡኬስ ዴንሲዲኔ ያሴ ጋላቲ ባሲዲ “ሄዬቴ! ሚቴ! ሃይሲ ኢንቴስ ጊዲዛ ታ አሾ። ታና ቆፓናስ ኢንቴ ሃይሳ አሲቴ” ጊዴስ። 25 ሄሳሶካ ካዎፕ ጉዬ ኡሻ ዴንሲዲ “ሃይሲ ኡሻይ ታ ሱላን ሃንዛ አራሳ ጫቆ። ሄሳ ጊሽ ኡሻፊ ኢንቴ ኡዬዛ ዎዴ ሃይሳ ታና ቆፓና ማላ አሲቴ” ጊዴስ። *

26 ሃይሳ ኡኬሳ ኢንቴ ሚዛ ዎዴኔ ሃይሳ ኡሻካ ኡዬዛ ኡባ ዎዴ ጎዳይ ያና ጋካናስ ኢንቴ ኢዛ ሃይቆ ዮታና። 27 ሄሳ ጊሽ አኒካ ቤሶንታ ዲሺን ሃይሳ ኡኬሳ ሚኮ ዎይኮ ጎዳ ኡሻ ኡዬኮ ኢዛዴይ ጎዳ አሾኔ ኢዛ ሱሳ ካዉሺዳ ጊሽ ኢዚ አይሼታና። 28 አኒካ ሃይሳ ሃ ኡኬሳ ማናፔኔ ኡሻፊ ኡያናፕ ካሴቲ ባርካ ባና ፓሮ። 29 ጋሶይካ አኒካ ጎዳ አሾ ባሲ ጌሎንታ ዲሺን ሚኮኔ ጎዳ ኡሻ ኡዬኮ ኢዛዴይ ባርካ ባ ቦላ ፒርዳ ኤሄስ። 30 ኢንቴ ጋርሳን ዳር አሳይ ዳቡሪዳይኔ ሳኬቲዳይ ቃሴካ ባጋይ ሃይቁዳይ ሄሳ ጋሶና። 31 ኑ ኑርካ ኑና ፓጪዛኮ ኑ ቦላ ፒርዳና። 32 ጊደ አቲን ጎዳይ ፒርዲዛ ዎዴ ኑ ሃንኮ አማኖንታ አሳራ ፒርዴቶንታ ማላ ኢዚ ኑና ካሴቲ ሙሬስ።

33 ሄሳ ጊሽ ታ ኢሻቶ! ኢንቴ ማና ሺቁዛ ዎዴ ኢሶይ ኢሳራ ናጌቲቴ። 34 ኢንቴ ሺቁዛ ሺቆይ ፒርዳስ ጊደንታ ማላ ኢንቴፊ

* 11:25 ኬሳ 24:8፣ ኤር 31:31-34

አኒካ ጋራዳዴይ ዲኮ ካሴቲዲ ባ ሶን ሞ። ሃንኮ አቲዳይሳ ታኒ ሃራ ዎዴ ሄ ኢንቴኮ ባዳ ዎጋ ዎሳና።

12

ጊሎ አያና ኢሞታታ

1 ታ ኢሻቶ! አያናይ ኢሚዛ ኢሞቴሳ ጊሽ ኢንቴ ኢሲ ሚሽ ኤራና ማላ ታ ኮያይስ። 2 ኢንቴ አማናናፔ ካሴ ጮ ሜላ ያኔ ሃኔ ጉሳን ኢንቴ ኤሮንታ ካሴሴቲዲ ዱና ዱዴ ጊዲዳ ኤቃታኮ ቢዳይሳ ኢንቴካ ኤሬታ። 3 ሄሳ ጊሽ አኒካ ያሳ አያናን ሃሳዬሽ “ዮሱሲ ቃንጌቲዳዴ” ጌና። ሄሳሶካ ጊሎ አያናን ጊዲዲ አቲን አኒካ “ዮሱሲ ጎዳ” ጋና አሲ ዶንታይሳ ታ ኢንቴስ ዮታይስ።

4 አሳስ ኢሞቴሲ ዱማ ዱማ ጊዲሺን አያናይ ጊዲኮ ኢሲኖ። 5 አሶይካ ዱማ ዱማ ጊዲሺን ጎዳይ ጊዲኮ ኢሲኖ። 6 ዱማ ዱማ አሶ አጌቲ ዲኮካ ወርሲካ አሲዛይ ኢሲ ያሳ።

7 ጊዶ አቲን ጊሎ አያና ቆንጨሶ ኢሞታይ ኢሳዴስ ኢሜቲዛይ ኢሲፌ ጎጫታናሳ። 8 ኢሳዴስ ሂላን ሃሳያና ኤራቴሲ ኢሜቲስ። ሃራ አሳስ ቃስ ሄ አያናንካ ኤራቴሳ ቃላን ሃሳያና ቃላይ ኢሜቲስ። 9 ኢሳዴስ ሄ አያናን አማኖይ ኢሜቲስ። ሃራ አሳስ ቃስ ሄ አያናኒካ ሃርጊዛይታ ፓሲዛ ኢሞታይ ኢሜቲስ። 10 ኢሳዴስ ማላሊሲዛ አሶ አሲዛ ኢሞታይ፤ ቃሴካ ሃራ አሳ ቡሮ ቲንቢቲ ቃላ ሃሳያ ኢሞታይ፤ ሃራ አሳ ቃሴካ አያናታ ሻኪ ኤሮይ፤ ሃራ አሳስ ዱማ ዱማ ቃላን ሃሳያይ፤ ቃሴካ ሃራ አሳስ ሃራ ዱማ ዱማ ቃላን ሃሳዮቲዳይሳ ቢርሻና ኢሞታይ ኢሜቲስ። * 11 ሄይቲ ወሪካ ሄ ኢሲ አያናይ ኢሚዛ ኢሞታ ጊዲሺን ኢሲ ኢሲ አሳስ ባ ኮይዳ ማላ ኢሜስ።

ኢሲ አሳቴስ ቦላ ዱማ ዱማ ቢሊቴቲ ዴቴስ

12 ኢሲ አሳቴሳ ቦላ ዳሮ ቢሊቴቲ ዲኮካ አሳቴሳይ ኢሲኖ። ጊዶ አቲን ቢሊቴቲ ዳሮ ጊዲኮካ አሳቴሳይ ኢሲኖ ያላላ። ኪርስቶሲካ ሄሳ ማላ። * 13 አይሁዳ አሳታ ጊዲንካ ጊሪኬ አሳታ ጊዲንካ፣ አይሴ ጊዲንካ ዎይኮ ጎቃ አሳታ ጊዲንካ ኑ ወሪካ ኢሲኖ ጊዳናስ ኢሲ አያናን ያማቁቲዶስ። ኑ ወሪካ ሃ ኢሲ አያናፔ ኡዬዶስ።

14 አሳቴሲ ሜዴቲዳይ ዳሮ ቢሊቴታፔ አቲን ኢሲ ቢሊቴፔ ያላላ ጊዴና። 15 ቶሆይ “ታ ኩሼ ጊዶንታ ጊሽ አሳቴሳ ጊዶን ዲኬ” ጊኮ ኢዚ ሂዝጊዳ ጊሽ ኢዛስ አሳቴሳን ዱሲ አታኔ? 16 ሃይሲ “ታ አይፌ ጊዶንታ ጊሽ አሳቴሳ ጊዶን ዲኬ” ጊኮ ሄሳ ጊሽ አሳቴሳ

* 12:10 ቲንቢቲ ቃላ ያሳ ቃላ ቢርሸስ ዎይኮ ቆንጨስ ዮቶ። * 12:12 አሮ 12:4-5

ጊደን ዱሲ ኢዛስ አታኔ? ¹⁷ አሳቴሲ ወሪካ አይፌ 9ላላ ጊዲዳኮ አዛን ሲያኔ? አሳቴሲ ወሪካ ሃይሴ 9ላላ ጊዲዳኮ አዛን ሲንጋኔ? ¹⁸ ጊደ አቲን ያሲ ኢሳ ኢሳ ባ ኮይዳ ማላ አሳቴሳ ጊደን ዳናስ ቤሲዛሶን ዎሲዴስ። ¹⁹ ቢሊቴይ ወሪካ ኢሲኖ ጊዲዳኮ ኩሜሳ አሳቴሲ አዋፕ ቤታኔ? ²⁰ ሄሳ ጊሽ ቢሊቴቲ ዳሮ ሺን አሳቴሲ ጊዲኮ ኢሲኖ 9ላላ።

²¹ አይፌይ ኩሼ “ኔና ታ ኮዩኪ” ጋናስ ዳንዳዩና። ሁዔይ ቶሆ “ኔና ታስ ኮሼና” ጋና ዳንዳዩና። ²² ሃራይ አቶሺን ኡባፌ ላፋ ሚሳቲዛ ቢሊቴቲ ዳሮ ኮሺዛይታ። ²³ ኑኒ ላፋ ጊ ሴቂዛ ቢሊቴታ ሃንኮይታፕ አሲ ቦንቾስ። ቃሴካ ኑ ኢስታን ዩላቶንታ ቢሊቴታስ ጊዲኮ ሄሳ ማላ ቦንቾ ኮሼና። ያሲ ጊዲኮ አሳቴሳ ቢሊቴታ ኢሲ ቦላ አይሴሲዲ ቦንቾይ ፓጫዛይታስ አዴሳ ቦንቾ ኢሚዴስ። ²⁵ ኢዚ ሄሳ አሲዳይ አሳቴሳ ቢሊቴታ ጋርሳን ሻኮቴሲ ዶንታ ኢስቲ ባ ጋርሳን ኢሶይ ኢሳ ባናራ ጊና ጊ ቆፓናሳ። ²⁶ ኢሲ ቢሊቴይ ሳኪቲኮ ሃንኮ ቢሊቴቲ ወሪካ ኢዛራ ኢሲፌ ሳኪቴቴስ። ኢሲ ቢሊቴይ ቦንቾቲኮ ቢሊቴቲ ወሪካ ኢሲፌ ኡፋዩቴቴስ።

²⁷ ሂስቲኮ ኢንቴ ወሪካ ኪርስቶሳ አሳቴሳ፤ ኢንቴ ኢሶይ ኢሶይ ኢዛ አሳቴሳ ቢሊቴታ። ²⁸ ያሲ ዎሳ ኬሳ ጊደን ኮይሮ ሃዋሬታ፣ ናምዓን፣ ቃሴ ናቤታ፣ ሄቫን፣ አስታማሬታ፣ ካሌሲዲ ማላታ አሲዛይታ፣ ፓሲዛ ኢሞቴሲ ዲዛይታ፣ ሃራታካ አስ ማዲዛ ኢሞታይ ዲዛይታ፣ ዴሬ አይሶ ኤራቴሲ ዲዛይታኔ ዱማ ዱማ ቃላ ሃሳያና ኢሞቴሲ ዲዛ አሳታ ዎሲዴስ። ²⁹ ወሪካ ሃዋራቴ? ወሪካ ናቤቴ? ወሪካ አስታማሬቴ? ወሪካ ማላሊሲዛ ሚሼ አሲዛ? ³⁰ ኡባስካ ሃርጊዛይታ ፓሲዛ ኢሞታይ ዲዜ? አሲ ወሪካ ዱማ ቃላን ሃሳዩዜ? ዱማ ቃላን ሃሳዩቶይሳ አሲ ወሪ ቢርሺዜ? ³¹ ጊደ አቲን ኢንቴ ወሪካ ኡባፌ አዲዛ ኢሞቴሳ ሎዔሲ ኮዩቴ።
ቃሴካ ሃራ ኡባፌ አዲዛ አጌ ታ ኢንቴና ቤሳና።

13

ቴሙ ሲቆ

¹ ታ አሳ ቃላኒኔ ሳሎ ኪታንቻታ ቃላን ሃሳዩኮካ ታስ ሲቆይ ባይንዳ አጊኮ ጮ ሜላ ቢራታ ጊሪሳ ማላ ዎይኮ ዳላ ጊሬሳ ማላ።
² ቲንቢቴ ሃሳዩዛ ኢሞታይ ታስ ዲኮካ፣ ዎይኮ ፁራ ዮዖታኔ ኤራቴሳ ወርሳ ታ ኤሪኮካ፣ ዙማይ ኢዚ ዲዛሶፕ ዶቃዳ ሃራሶ ዲጊዛ አማኖይ ታስ ዲኮካ ሄሳ ወርሳካ ሲቆይ ባይንዳ ታ አሲኮ ሄሲ ሜላ ሃዳ። * ³ ታስ ዲዛዝ ወርሳ ማንቆታስ ታ ኢሚኮካ፣

* 13:2 ማቶ 17:20፤ 21:21፤ ማር 11:23

ታ አሳቴስ ታ ታማን ፀ-ጊኮካ፥ ሲቆይ ባይንዳ አጊኮ ታና ሄሲ አይኮካ ማዴና። *

4 ሲቆይ ዳንዳያ፥ ቃሴካ ኪያ፤ ሲቆይ ሚቃይኔና፤ ጨቁቴና፤ አቶሬቴና፤ 5 ቤሶንታዝ አሴና፥ ባርካ ባ ጎዓ ሃላላ ሄሴና፥ ቆሆ ቆዳን ዩጊና። 6 ሲቆይ ቱማንፔ አቲን ማካላን ኡፋዩቴና። 7 ሲቆይ ኡባ ዎዴ ዳንዳዩስ፥ ኡባ ዎዴካ አማኔስ፥ ኡፋይስ አሴሲኔ ሚኒ ኤቁስ።

8 ሲቆይ ሙሌካ ኩንዴና፥ ቲንቢቴይ ጊዲኮ አታና፥ ሃራ ቃላን ሃሳያይካ አታና፥ ኤራቴሲካ ሻሬታና። 9 ጋሶይካ ኑ ኤሪዛይ ወርሲ ጊዶንታ ሻኪ ኤርስ። ቲንቢቴ ሃሳያ ጊዲኮካ ባጋ ሃሳዮስ። 10 ጊዶ አቲን ወርሴሴ ጋኪዛ ዎዴ ኩሜስ ጊዶንታ ኢሞታይ ሄ ዎዴ ሻሬታና።

11 ታ ጉሳ ናቴቴላን ዳሼ ና ማላ ሃሳያይሲኔ ና ማላ ቆፓይስ፥ ና ማላካ ዩሻ ቆፓይስ። ካሃ ኩንሲዳፔ ጉዬ ካሴ ናቴላን ሃኒዛይሳ ወርሳካ ዩጋ አጋዲስ። 12 ኑኒ ሃሂ ቤይዛይሲ ሃሳን ሄሊዛ ማላ ሮ ቦገር ቦገቴስ ሺን ሄ ዎዴ ጊዲኮ ኑ ኢዛ አይፌሶ ሎዔሴ ቤያና። ታ ሃሂ ኩሜስ ጊዶንታ ባጋ ሃላላ ኤራይስ። ሄ ዎዴ ጊዲኮ ታኒ ታ ሁዔስ ኤሬቴዳይሳ ማላ ኤራና።

13 ሄሳ ጊሽ አማኖይ፥ ሂዶታይኔ ሲቆይ ሃይቲ ሄቫቲ ኤቁ ዳና፥ ሃይታ ኡባፌ አዲዛይ ሲቆ።

14

ኢሞታታን ቤሲዛ ማላ ጎዔቴስ

1 ሲቆ ካሊቴ፤ አያና ኢሞቴላታ ሃራፔካ ቲንቢቴ ሃሳዩዛ ኢሞታታ ሎዔሴ ኮዩቴ። 2 ሃራ ቃላን ሃሳዩዛዴይ ዎሳስ አቲን አሳስ ሃሳዩና። ፀ-ራ ጊዲዳ ዮዎ አያናን ሃሳዩዛ ጊሽ ኢዚ ጊዛይ አሳስ ጌሌና። 3 ቲንቢቴ ሃሳዩዛዴይ አሳ ሚንሴላናስ፥ ዴንሴላናሲኔ ጎዳናስ ሃሳዩስ። 4 ሃራ ቃላን ሃሳዩዛዴይ ቃስ ባርካ ባና ሚንሴሴስ። ቲንቢቴ ሃሳዩዛዴይ ጊዲኮ ዎሳ ኬላ ጎዔስ።

5 ኢንቴ ወሪካ ሃራ ቃላን ሃሳዩዛኮ ታ ዶሳይስ ሺን ሄሳፌካ ቦላራ ኢንቴ ቲንቢቴ ቃላን ሃሳዩዛኮ ታ ዶሳይስ። ዎሳ ኬላይ ሚናና ማላ ሃራ ቃላራ ሃሳዩዛዴይ ባ ሃሳዩዛይሳ ቢርሾንታ ኢዚ ሃራ ቃላራ ሃሳዩዛይሳፌ ቲንቢቴ ሃሳዩዛዴይ አዴስ። 6 ሄሳ ጊሽ ታ ኢሻቶ! ታ ኢንቴኮ ቤዛ ዎዴ ታ ኢንቴስ ቆንጨሴላን ዎይኮ ኤራቴላን ዎይኮ ቲንቢቴን፥ ዎይኮ ቲሚርቴን ዮቶንታ ሃራ ቃላራ ዮቴኮ ሄሲ ኢንቴና አይ ጎዔኔ?

* 13:3 ታማን ፀ-ጊኮካ ኢሲ ኢሲ ጊሻ ማፋቲ አቶሬቴላስ ጊዛ።

7 ሄሲ ጮ ሱሱልዔ ማለኔ ዲሳ ማላ ሼምፖይ ባይንዳ ኢስታ ጊሪሳስ ዱማቴሌ ሻኬቲ ኤሬቶንታ አጊኮ ኢዛ ዎስቲ ኤሬኔ? 8 ቃሴካ ፁሩምባይ አዛስ ፑኔቲዛኮ ዎይኮ ዛዩይ አዛስ ዛዩቲዛኮኔ ሻኪ ኤሬቶንታ አጊራ ፑኔቲኮ አኒ አላስ ጊጌታኔ?

9 ኢንቴካ ሄሳ ማላ። ኢንቴ ዱናፔ ኤሬቲዛ ቃላይ ኪዞንታ አጊኮ ኢንቴ ጊዛይሳ አኒ ኤሬኔ? ጮ ሚላ ጫርኮን ዳያና። 10 አላሜ ቦላ ዳሮ ዱማ ዱማ ቃላይ ዴስ ሺን ቢርሼሊ ባይንዳ ቃላይ ባዎ። 11 ሄሳ ጊሽ ኢሳዴይ ሃሳዩዛ ቃላ ቢርሼሊ ታ ኤርንታ አጊኮ ሃሳዩዛዴስ ታ ኢማሴ ጊዳይስ። ኢዛዴይካ ታስ ኢማሳ ጊዴስ። 12 ኢንቴካ ሄሳ ማላ አያናን ኢሞቴሳታ ዴማናስ ኮዩዛ ጊሽ ዎሳ ኬሳ ጎዲዛ ኢሞቴሳ ዴማናስ ሎዔሊ ኮዩቴ።

13 ሄሳ ጊሽ ሃራ ቃላን ሃሳዩዛ አሲ ባ ሃሳዩዳይሳ ቢርሼሊ ኤራና ማላ ባሲ ዎሶ። 14 ታኒ ሃራ ቃላራ ዎሲዛ ዎዴ ታ አያናን ዎሳይስ አቲን ታ ኢዛፔ አይኮካ ኤሪኬ። 15 ሂስቲን ታ አይ አሳና ማላ ታስ ቤሲዜ? ታኒ ታ አያናንካ ዎሳና። ዎዝናን ዎሳዳካ ዎሳና። ታ አያናንካ ዩፃና። ዎዝናራካ ዩፃና። 16 ሄሳላ ጊዶንታ አጊኮ ኔ ዎሴ አያናን ጋላቲዛ ዎዴ ሄሳ ኤርንታ ኢሲ ኢማሳ አሲ ኔ ጋላታ ዎሳ ዎስቲ “አሚን” ጋናስ ዳንዳዩዜ? 17 ኔ ቤሲዛ ማላ ጋላታናስ ዳንዳያሳ። ሃንኮይሲ ጊዲኮ ኢዛን ጎዔቴና።

18 ታኒ ኢንቴፌ ቦላራ ሃራ ቃላን ሃሳዩዛ ጊሽ ዎሴ ጋላታይስ። 19 ጊዶ አቲን ዎሳ ኬሳን ኤሬቶንታ ዳሮ ሺ ቃላታ ሃሳያናፔ ሃራ አሳታ ታማርሳናስ አሳይ ኤሪዛ ኢቻሽ ቃላ ሃሳያና ዶሳይስ።

20 ታ ኢሻቶ! ኢንቴ ኢንቴ ቆፋን ጉሳ ናይታ ማላ ጊዶፒቴ። ኢታ አሶስ ጊዲኮ ጉሳ ናይታ ማላ ጊዲቴ። ቆፋን ጊዲኮ ካሃ ኩንሲዳ አሳታ ጊዲቴ። 21 ካሴ ዎጋንካ

“ኢስታ ቃላይ ኢማሳ ጊዲዳ አላጋ አሳታ ቃላራ ታ ሃይሳ አሳስ ዮታና። ሄሳላ ዮቲንካ ታ ጊዛዝ ኢስቲ ሲዩቴና’ ጌስ ጎዳይ”

ጌቴቲ ካሴ ጌሻ ማፃፋን 9ፌቲዴስ። *

22 ሄሳ ጊሽ ሃራ ቃላን ሃሳያይ አማኖንታ አሳስ ማላታ ጊዴስ አቲን አማኒዛይታስ ማላታ ጊዴና። ቲንቢቴይ ጊዲኮ አማኒዛይታስ አቲን አማኖንታይስ ጊዴና።

23 ሂስቲኮ ዎሳ ኬሳን አማኒዛ አሳይ ኢሲፌ ሺቂዳሶን ዉሪካ ኤርንታ ሃራ ቃላን ሃሳዩሺን ኢማሳ አሳቲ ዎይኮ አማኖንታ አሳይ ሺቂዳ ሃሳዩዛሶ ጌሊኮ “ሃይቲ ጎዩቴስ” ጌቴኔ? 24 ጊዶ አቲን አሳይ ዉሪ ቲንቢቴ ቃላ ሃሳዩቲሺን ኢማሊ ዎይኮ አማኖንታዴይ ጌሊኮ ባ ሲዩዳይሳ ሉባ ኤራናኔ ሄ ቃላን ፒርዴታና። 25 ኢዛዴይ ባ

* 14:21 ኢሳ 28:11-12

ዎዝናን ቆቲ ዎሲዳዚ ወሪ ቆንጫናኔ ኢዚካ ባ ባጋራ “ቱማፔ ዎሲ ኢንቴናራ ዴስ” ጊዲ ጉፋኒዲ ዎሳስ ጎይናና።

26 ሄሳ ጊሽ ታ ኢሻቶ! ሂስቲን አይ ጊኖ? ኢንቴ ኢሲፌ ሺቂዛ ዎዴ ኢንቴፌ ኢሲ ኢሲ አሳስ ዩሉ ቃሴ ኢሲ ኢሲ አሳስ ቲሚርቴይ ዴስ። ኢሲ ኢሲ አሳስ ቆንጮንታ ፀራ ሚሻታ ቆንጨሲዛ ኢሞታይ ዴስ። ሃራ አሳስ ዱማ ቃላን ሃሳያና ኢሞታይ ዴስ። ሃራስ ቃሴ ሄ ቃላ ቢርሼሳ ኢሞታይ ዴስ። ሄሲ ሄ ኢሞታይ ወራካ አማኒዛይታ ጎፃናስ ቤሴስ። 27 ሃራ ቃላራ ሃሳዩዛይ ዲኮ ናምዑ አስ ዎይኮ ዳሪ ዳሪኮ ሄኹ ጊዲዲ ታራን ታራን ዮቴቶ። ሃራ አሲ ቃሴ ቢርሸ። 28 ቢርሸዛዴይ ባይንዳ አጊኮ ሺቂዳ አሳ ጊዶን ጮዑ ጊዲ ባሲ ዓላላኔ ዎሳስ ዓላላ ዮቶ።

29 ቲንቢቴ ሃሳያ ኢሞታይ ዲዛይቲ ናቤቲ ናምዓቲ ዎይኮ ሄኻቲ ቲንቢቴ ሃሳዮቶ። ሃንኮ አሳይ ዮቴቲዳይሳ ሎዔሲ ፓጮ።

30 ኡቲዳ አሳ ጋርሳፌ ኢሳዴይ ኢሲ ሚሺ ቆንጨኮ ኮይሮ ሃሳዩዛይሲ ጮዑ ጎ። 31 ኢንቴ ጋርሳፌ ኢሲ ኢሲ አሲ ታማራና ማላኔ ሚኔታና ማላ ኢንቴ ወራካ ታራን ታራን ቲንቢቴ ዮታናስ ዳንዳዮታ። 32-33 ናቤታ አያናይ ናቤታስ አዛዜቴስ። ጋሶይካ ዎሲ ሳርቴሳ ዎሳፌ አቲን ዎጫማ ዎሴ ጊዴና። አማኒዛይታ ዎሳ ኬሴ ኡባሶንካ ሄሳ ማላ። 34 አማኒዛ አሳይ ጎይናስ ሺቂዛሶን ማጫሳቲ ጮዑ ጌቶ። ሙሴ ዎጋይ ካሴ ጊዳ ማላ ኢስቲ አዛዜቴቶ አቲን ሺቆሶን ኢስቲ ሃሳያና ማላ ኢስታስ ኢሜቲቤና። 35 ማጫሳቲ ኡራናስ ኮዩዛ ኢሲ ኢሲ ዮጋቲ ዲኮ ባ ኬሳን ባ አዚናታ አይጅቶ። ጋሶይካ ማጫሲ ሺቆሶን ሃሳያይ ዩላቺዛዛ።

36 ዎሳ ቃላይ ኢንቴፌ ኬዚዴ? ዎይኮ ኢንቴኮ ዓላላ ጋኪዴ?

37 አኒካ ባና “ናቤ” ጊኮ ዎይኮ “ታስ ጊሎ አያናፔ ኢሞቴሲ ዴስ” ጊዛዴይ ዲኮ ሃይሲ ታ ኢንቴስ ዓፌዳይሲ ጎዳ አዛዞ ጊዲዳይሳ ኤሮ። 38 ሃይሳ ኤሮንታ አሲ ዲኮ ኢዚ ባ ሁዔስ ኤራቴና።

39 ሄሳ ጊሽ ታ ኢሻቶ! ቡሮ ቲንቢቴ ሃሳያናስ ሎዔሲ ኮዩቴ። ዱማ ዱማ ቃላን ሃሳያካ ዲጎፍቴ። 40 ጊዲኮካ ወራካ ማራራኔ ዎጋራ ጊዶ።

15

ኪርስቶሳ ዴንዶ

1 ሃዒካ ታ ኢሻቶ! ታ ኢንቴና ሳባኪን ኢንቴ ኡኪዲኔ ኢዛን ሚኒ ኤቂዳ ሚሺራቾ ቃላ ሃዒ ቆፊሳና ኮያይስ። 2 ታ ኢንቴስ ሳባኪዳ ቃላ ኢንቴ ሎዔሲ አይኪኮ ሄ ሚሺራቾ ቃላን ኢንቴ አታና። ሄሳ ማላ ጊዶንታ አጊኮ ኢንቴ አማኖይ ጮ ሜላ ሃዳ።

3 ታኒ ታስ ኤኪዳይሳኔ ኡባፌ አዲዛይሳ ኢንቴስ አሳ ኢማዲስ። ጌሻ ማፃፋቲ ጊዛይሳ ማላ ኪርስቶሲ ኑ ናጋራ ጊሽ ሃይቂዴስ።

* 4 ሞጊቲደስ፤ ጌሻ ማፃፋታን ፃፊቲዳይሳ ማላ ሄቫንሶ ጋላስ ሃይቆፕ ዴንዲደስ። * 5 ሄሳፌ ካሊዲ ዴፅሮሳስ ቤቲደስ። ቃሴካ ዩሱሳ ካሊዛ ታማኔ ናምዓታስ ቤቲደስ። * 6 ሄሳፌ ጉዩ ኢቻሹ ሄቱፕ ቦላራ ዲዛ አማኒዛይታስ ኢሲቶ ቤቲደስ። ሄ ኢዛ ቤይዳ አሳፕ ዳሪዛ ባጋይ ፓፃ ዴስ። ባጋይ ቃሴ ሃይቂደስ። * 7 ሄሳፌ ጉዩ ያቆቤስ ቤቲደስ። ካሊዲካ ኩሜሳ ሃዋሬታስ ቤቲደስ።

8-9 ታኒ ሃዋሬታ ኡባፌ ላፋኔ * ካሴ ያሳ ያሳ ኬሴ ጎዲዳ ጊሽ ሃዋሬ ጌቱታናስ ታኒ ቤሶንታዴኮ ሺን አሳ ወርሶፌ አወጫያ ሚሳቲዛ ታስካ ቤቲደስ። * 10 ጊዶ አቲን ያሳ ኪያቴሳን ሃኒ ታ ሃናናይሳ ሃናዲስ። ታስካ ኢሜቲዳ ያሳ ኪያቴሳ ሜላ ሃዳ ጊዲቤና። ታኒ አናፕካ ቦላራ ዳሮ ሚና አሳዲስ። ጊዶ አቲን ሄሳ አሊዳይ ታና ጊዶንታ ያሳ አጾ ኪያቴሳ አሊደስ። 11 ሄሳ ጊሽ ታና ጊዲን ኢስታካ ጊዲን ኑ ወርካ ሳባኪዛይ ሄሳ። ኢንቴካ አማኒዳይ ሄሳ።

ሃይቂዳ አሳ ዴንሳ

12 ኪርስቶሲ ሃይቆፕ ዴንዲዳይሳ ኑ ታማርሲኮ ሂስቲን ኢንቴ ጋርሳፌ ኢሲ ኢሲ አሳቲ ዋኒዲ ሃይቆፕ ዴንዶይ ባዋ ጊዞ? 13 ሃይቂዳ አሳስ ዴንሳ ዶንታዝ ጊዲኮ ኪርስቶሲካ ዴንዲቤና ጉሳካ? 14 ኪርስቶሲካ ሃይቆፕ ዴንዶንታዝ ጊዲኮ ኑ ሳባኮስ ጎዳይ ባዋ። ኢንቴ አማኖይካ ጮ ሜላ ሃዳ። 15 ሄሳፌካ ቦላራ “ዮሲ ኪርስቶሳ ሃይቆፕ ዴንሳደስ” ጊዲ ኑ ማርካቲዳ ማርካይካ ኑና ዎርዶ ያሳ ማርካታ ኬሲደስካ? ሃይቂዳ አሳይ ሃይቆፕ ዴንዶንታዝ ጊዲኮ ዮሲ ኪርስቶሳካ ዴንሳቤና ጉሳ። 16 ጋሶይካ ሃይቂዳይቲ ዴንዶንታዝ ጊዲኮ ኪርስቶሳካ ሃይቆፕ ዴንዲቤና። 17 ኪርስቶሲ ሃይቆፕ ዴንዶንታዝ ጊዲኮ ኢንቴ አማኖይ ጮ ሜላ። ኢንቴካ ሃኖ ጋካናስ ኢንቴ ናጋራራ ዴታ ጉሳ። 18 ሃኖይ ሄሳ ማላ ጊዲኮ ኪርስቶሳ አማኒዲ ሃይቂዳይቲ ወርካ ጳይዳ ጉሳ። 19 ኑኒ ኪርስቶሳን ኡፋይስ አሊዛይ ሃኖ ቤታይ ቦላ ዱሳስ ፃላላ ጊዲኮ ኑ አሳ ኡባፌ ላፋታ።

20 ጊዶ አቲን ኪርስቶሲ ሃይቂዳይታስ ኡባስ ባይራ ጊዲዲ ሃይቆፕ ቱሙ ዴንዲደስ። 21 ሃይቆይ ኢሲ አሳ አዳሜ ባጋራ ዩዳ ማላ ሃይቂዳይታ ዴንሳ ኪርስቶሳ ባጋራ። 22 አሲ ወርካ አዳሜ ባጋራ ሃይቂዳ ማላ ሄሳሶካ አሲ ወርካ ኪርስቶሳ ባጋራ ሃይቆፕ ዴንዳና። 23 ጊዶ አቲን ወርካ ባ ታራራ ታራራ ዴንዳና።

* 15:3 ኢሳ 53:5-12 * 15:4 ማዛ 16:8-10፤ ማቶ 12:40፤ ሃዋ 2:24-32
 * 15:5 ሉቃ 24:34፤ 36፤ ማቶ 28:16-17፤ ማር 16:14፤ ዮሃ 20:19 * 15:8-9
 ሃዋ 9:3-6 * 15:8-9 ሃዋ 8:3

ኮይሮ ባይራ ጊዲዳ ኪርስቶሲ ዴንዲዴስ። ኢዛፔ ካሊዲ ኢዚ ዩዛ ዎዴ ኪርስቶሳስ ጊዲዛይቲ ዴንዳና። 24 ሄሳፌ ጉዩ ሃሬቲዛ ዴሬታ ጎዳቴሌኔ ዎልቃማታ ወርሲ ዳይሲዳፔ ጉዩ ካዎታ ያሳ አዋስ አሲ ኢሚዛ ዎዴ ሄ ዎዴ ወርሴስ ጊዳና።

25 ኢዚ ባ ሞርኬ ወርሲካ ባ ቶሆ ጋርስ አላና ጋካናስ ኢዚ ካዎታናስ ቤሴስ። * 26 ቡሮ ወርሴላን ሦኔቲ ዳያና ሞርኬይ ሃይቆ። 27 “ዎሲ ወርሲካ ኢዛ ጎዳቴላፌ ጋርሳን ዎሲዴስ” ጊዛዚ ጌሻ ማፃፍን ፃፌቲዴስ። ጊዶ አቲን “ወሪካ ኢዛ ጎዳቴላ ጋርሳን ጊዲዴስ” ጊሺን ወሪካ ኢዛ ጎዳቴላ ጋርሳን አሲዳ ያሳ አዋ ጉጂና።

* 28 ወሪካ ኢዛስ ሃሬቲዳይሳፌ ጉዩ ያሲ ወርሶፌ ቦላ ጊዳና ማላ ያሳ ናይ ቃሴ ኡባ ባሲ ሃሪሲዳይሳስ ያሳ አዋስ ሃሬታና።

29 ሃይቆፔ ዴንሲ ዶንታ አጊኮ ሂስቲን ሃይቂዳ አሳ ጊሽ ጊዲ ፃማቂቲዛ ኡባስ ጎፃይ አዜ? ሃይቂዳይቲ ሙሌካ ዴንዶንታዝ ጊዲኮ ሂስቲን አሳይ ኢስታ ጊሽ አዛስ ፃማቂቲዜ? 30 ኑ ቃስ ኡባ ዎዴ ኢቲ ሜቶስ አዲ ኢሜቲዛይ አዛሴ? 31 ታ ኢሻቶ! ሃቸ ሃቸ ሃይቆይ ታናራ ጋጌስ። ሄሳካ ኑ ጎዳ ዩሱስ ኪርስቶሳ ጊዶን ኢንቴ ቦላ ዲዛ አማኔቴስ ታ ኢንቴስ ቆንጨሳይስ። 32 ታኒ ኤፌሶኔን ዶፃ ሚሳቲዛ አሳታራ ባይቲዳይሲ አሲ ቤያና ማላ ፃላላ ጊዲኮ ታስ ኢዛን አዛ ዎዴይ ዲዜ? ሃይቂዳይታስ ዴንሲ ዶንታ አጊኮ “ኑ ዎንቶ ሃይቃና ጊሽ አኔ ሞስ፣ አኔ ኡቶስ” ጊዛይታ ማላ ኑካ ኢስታ ማላ ጊዶስ። *

33 ኢንቴ ባሌቶፍቲ! ኢታ ላጌቴሲ ሎዎ አማሌራ ዲዛይታ ሞሬስ። 34 ዎዝናማ ጊዲቴ፤ ናጋራ አሶፍቲ፤ ያሴ ኤሮንታይታ ኢሲ ኢሲ አሳቲ ኢንቴ ጋርሳን ዲዛ ጊሽ ታ ሄሳ ኢንቴና ዩላቻናስ ጋይስ።

ሃይቆፔ ዴንዳና አሳቴስ

35 “ሃይቂዳይቲ ዋኒ ዴንዳኔ? አይ ማላ አሾራ ዴንዳኔ?” ጊዛዴይ ዳና ዳንዳይስ። 36 ኔኖ ኤያዞ! ኔ ዜሪዛ ዜሬሳይ ሃይቆንታ ዲሼ ጫሬና። 37 ኔኒ ዜሪዛ ካሳ ሞዴያ ጊስቴ ዎይኮ ሃራ ካሳ አይፌ ጊዲኮካ ጉዩፔ ኔ ኤካናራ ሃዲ ኔ ዜሮሮ ጊዳኩ። 38 ያሲ ቃሴ ባ ኮይዳ ማላ ሄ ዜሬሳስ ኢዛ ማላ ሜዶ ኢሜስ። ዜሬሳ ቆሞታስ ኢሳስ ኢሳስ ኢዛ ሚሳቲዛ አሳቴስ ኢሜስ።

39 አሾይ ወሪካ ኢሲ ማላ ጊዴና። አሳ አሾይ ኢሳ ጊዲሺን ሜሄ አሾይ ቃሴ ሃራ፤ ካፎ አሾይ ሃራ፤ ሞሌ አሾይካ ሃራ ቆሞ።

40 ሄሳ ማላካ ሳሎን ዲዛይታሲካ ኢስታ ሚሳቲዛ ሜዶይ ዴስ። ቢታ ቦላ ዲዛይታሲካ ኢስታ ሚሳቲዛ ሜዶይ ዴስ። ጊዶ አቲን

* 15:25 ማዛ 110:1 * 15:27 ማዛ 8:6 * 15:32 ኢሳ 22:13

ሳሎይታ ቦንቾይ ኢሲ ማላ። ቢታ ቦላ ዲዛይታ ሜዶ ቦንቾይካ ዱማ። 41 አዎ አርሼ ቦንቾይ ኢሲኖ። ጊዶ አቲን አጊና ቦንቾይ ቃሴ ዱማ። ያሊንቴታ ቦንቾይካ ሃራ። ኢሲ ያሊንቴ ቦንቾይ ሃራ ያሊንቴ ቦንቾፌ ዱማቴስ።

42 ሃይቂዳ አሳ ዴንሲካ ሄሳ ማላ። ዎቂዛ ሜዶይ ዜሬቲን ዎቆንታ ሜዶይ ዴንዳና። 43 ካዉሻቴላን ዜሬታና ሺን ቦንቾን ዴንዳና። ዳቡርሳን ዜሬታና ሺን ዎልቃማ ጊዲዲ ዴንዳና። 44 ሜዴቴስ ሜዶይ ዜሬታና ሺን አያና ሜዶይ ዴንዳና። ሜዴቴስ ሜዶይ ዲኮ ቃሴካ አያና ሜዶይካ ዴስ።

45 ሄሳ ጊሽ “ኮይሮ አስ አዳሜይ ዴዎይ ዲዛ ሜዴቴስ ጊዲዴስ” ጌቴቲ ጌሻ ማፃፋን ፃፌቲዴስ። ናምዓንሶ አዳሜ ጊዲዳ ኪርስቶሲ ጊዲኮ አሳስ ዴዎ ኢሚዛ አያና። * 46 ጊዶ አቲን ኮይሮ ዩዳይ አያናይሳ ጊዶንታ ሜዴቴሳይሳ። አያናይሲ ቃስ ጉዩፔ ዩዳይሳ። 47 ኮይሮ ዩዳ አዳሜይ ቢታፌ ሜዴቴሳ ጊሽ ኢዚ ቢታፌ። ናምዓንሶ ዩዳይሲ ሳሎፕ። 48 ቢታፌ ጊዲዳይቲ ኢስቲ ቢታፌ ሜዴቴሳይሳ ማላ። ሳሎፕ ጊዲዳይቲ ሳሎፕ ዩዳይሳ ማላ። 49 ኑኒ ቢታ አሳ ሜዳ ማዮይሳሶካ ሳሎይሳ ሜዳካ ማይዳና።

50 ታ ኢሻቶ! ታ ሃይሳ ኢንቴስ ዮታይስ አሾይኔ ሱሲ ያሳ ካዎቴስ ላቴቴና። ዳያናይሲ ዳዮንታይሳ ላቴና።

51 አኔ ታ ኢንቴስ ኢሲ ፁራ ዮዎ ዮታይስ። ኑኒ ዉሪካ ሃይቆኮ። ጊዶ አቲን ኑ ዉሪካ ላሜታና። 52 ሄሲካ ሃናናይ ኑ ቆፖንታ ዲሺን ዉርሴላ ፁሩምባይ ፑኔቲዛ ዎዴ ቂጲዳ አይፌይ ዌለዛ ማላ ኢሲቶ ሃናና። ፁሩምባይ ፑኔታና፤ ሃይቂዳ አሳይ ዎቆንታይታ ጊዲዲ ዴንዳና። ኑኒካ ላሜታና። 53 ዳዩዛይሲ ዳዮንታይሳ ማይዳናስ፤ ሃይቂዛይ ሃይቆንታይሳ ማይዳናስ ቤሴስ።

54 ዳዩዛይ ዳዮንታዝ፤ ሃይቂዛይ ሃይቆንታዝ ማይዲዛ ዎዴ “ሃይቆይ ዮኔቲ ሚቴቲዴስ” ጌቴቲ ካሴ ጌሻ ማፃፋን ፃፌቲዳ ቃላይ ፖሌታና። * 55 ሄሳሶካ

“ሃይቆ! ካሴ ኔ ያኖይ አዎን ዲዜ?”

ሃይቆኮ! ኔ ኢዛራ ጫዲዛ ዩሻይ አዎን ዲዜ?”

ጌቴቲ ፃፌቲዴስ። * 56 ሃይቆይ ኢዛራ ዱኪዛ ዎልቃይ ናጋራ፤ ናጋራ ዎልቃይ ዎጋ። 57 ጊዶ አቲን ጎዳ ዩሱስ ኪርስቶሳ ባጋራ ኑስ ያኖ ኢሚዛ ያሳስ ጋላታይ ጊዶ።

58 ሄሳ ጊሽ ታ ሲቆ ኢሻቶ! ሚኒ ኤቂቴ። አይ ሚሻንካ ያርክ ያርኮፍቴ። ጎዳ አሶስ ኢንቴ ዳቡሪዛ ዳቡርሳይ ሃዳ ጊዶንታይሳ ኤሪዲ አባ ዎዴ ፓጩይ ባይንዳ ጎዳስ አሳናስ ሚኔቲቴ።

* 15:45 ሜዴ 2:7 * 15:54 ኢሳ 25:8 * 15:55 ሆሴ 13:14

16

ዩሩሳላሜን ዋዩቲዛ አማኒዛይታስ ሚሻ ኬሶ

1 ሃዒ ቃሴ አማኒዛይታስ ሚሻ ኬሶ ጊሽ ጋላቲያን ዲዛ ዎሳ ኬሳታስ ታኒ ኢሚዳ አዛዞ ማላ ኢንቴካ አሲቴ። * 2 ሚሻይ ኬዛናይ ቡሮ ታ ሄ ቢን ጊዶንታ ማላ ኢንቴፌ ኢሲ ኢሲ አሲ ባሲ ዲዛ ማላ ሳሚንታን ሳሚንታን ኢሲ ጋላስ ዎጋ ዎጋ ኬሲ ዎሶ። 3 ታ ሄ ቢዛ ዎዴ ኢንቴ ዶሪዳ አሳታስ ታ ሞይዞ ዳብዳቤ ፃፋ ኢማዳ፣ ኢስቲ ኢንቴ ኢሚዳ ኢሞታ ዩሩሳላሜ ጋላና ማላ ሃፔ ታ ኪታና። 4 ታ ኢስታራ ባናስ ኮሺዛዝ ጊዲኮ ታናራ ባንዴቴስ።

ጳውሎሳስ አጌ ባና ቆፋ

5 ታኒ ባሼ ማቀዶኒያራ አዳ ቡሲ ታስ አቶንታ ጊሽ ታ ማቀዶኒያ ጋካዳ ሄራ ኢንቴኮ ባና። * 6 ታ አዋካ ቢሺን ታና አጌይ ዋይሶንታ ማላ ኢንቴ ታና ማዳና ማላ ባሼ ታ ኢንቴ አቻን ጋምዎንታ አጊኬ። እኔ ኤሪዛይ ባልጎይ አዳና ጋካናስ ታ ኢንቴ አቻን ባልጎዛ አሶንታ ዋያ አጋና። 7 ታ ኢንቴ አቻን ዳሮ ዎዴ ጋምዳናስ ኮዬዛ ጊሽ ኢንቴና ጮ አጌራ አዳ ባሼ ቤያናስ ኮዬኬ። ጎዳ ሽኔ ጊዲኮ ኢንቴ አቻን አዱሳ ዎዴ ጋምዳናስ ኮያይስ።

8 ጊዶ አቲን ጴንፃቆስቴ ጌቴቲዛ ባፃሌ ጋላስ ጋካናስ ታ ኤፌሶኔን ጋምዳና። * 9 ታ ሄን ጋምዳና ጋሶይካ ታስ ሄን ጊታ አሶ ፔንጌይ ዶዩቲዴስ ሺን ታናራ ኤቁቲዛይቲ ዳሮቲ ዴቴስ።

10 ፂምቶሲ ኢንቴኮ ቢኮ ኢዚ ታ ማላ ጎዳ አሳንቻ ጊዲዳ ጊሽ ኢዚ ባቦይ ባይንዳ ዳና ማላ ኢንቴ ኢዛ ማዲቴ። * 11 ሄሳ ጊሽ አኒካ ኢዛ ካዶፖ። ኢዚ ታኮ ሳሮን ሲማና ማላ ኢንቴ ማዲቴ። ኑካ ሃራ አማኒዛይታራ ኢዛ ዩሳ ናጎን ዶስ።

12 ኑ ኢሻ አጲሎሲ ሃራ አማኒዛይታራ ኢንቴኮ ባና ማላ ኬሃ ዎሳዲስ ሺን ኢዚ ቃስ ሃዒ ኢንቴኮ ባናስ ኮይቤና። ጊዶ አቲን ባና አጌይ ጊጊሺን ኢዚ ኢንቴኮ ባና።

ዉሪሴሳ ዞሬኔ ሳሮካ

13 ቤጊቴ! አማኖን ሚኒ ኤቁቴ፤ ሚኒቴ፤ ጎብቴ። 14 ኢንቴ አሲዛዝ ዉርሲካ ሲቆን አሲቴ።

15 ታ ኢሻቶ! አካያ ቢታን ኮይሮ አማኒዳይ ኢስቲፋኖሴሶ አሳ ጊዲዳይሳኔ አማኒዛ አሳ ማዳናስ ኢስቲ ባና አሲ ኢሚዳይሳ ኢንቴካ ኤፌታ። * 16 ኢስታ ሚሳቲዛ አሳታሲኔ ኢስታራ ኢሲፌ ዳቡሪዛ አሳታስ ኡባስ አዛዜታና ማላ ታ ኢንቴና ዎሳይስ።

* 16:1 አሮ 15:25-26 * 16:5 ሃዋ 19:21 * 16:8 ሌዌ 23:15-21፤ ዛሬ 16:9-11 * 16:10 1ቆሮ 4:17 * 16:15 1ቆሮ 1:16

17 ኢስቲፋኖሲ፥ ፌርዶናዎሲኔ አካይቆሲ ዩዳ ጊሽ ታ ዳሮ ኡፋዩታይስ። ጋሶይካ ኢንቴ ሃን ታናራ ዶንታ ጊሽ ኢስቲ ታስ ፓጩዛዝ ዉርሲ ኩንሲዳ። 18 ታ ዎዝናኔ ኢንቴ ዎዝና ዉርሲ ሼምፒሲዳ። ሄሳ ጊሽ ሄሳንታ ማላ አሳታ ሙሌ ባሎፒቴ።

19 ኢሲያ ቢታን ዲዛ ዎሳ ኬሳቲ ኢንቴና ሳሮ ጌቴስ። አቂላይኔ ጳርሲቂላይካ ኢስታ ሶን ሺቂዛ አማኒዛ አሳይ ጎዳ ሱንሳን ቦንቾ ሳሮታ ኢንቴስ ሺሼቴስ። * 20 ሃን አማኒዛይቲ ዉሪካ ኢንቴና ሳሮ ጌቴስ። ኢንቴ ኢንቴ ጊዶን ኢሶይ ኢሳራ ሲቆ ዩሬቴስ ዩሬቴቴ።

21 ሃይሳ ሳሮካ ታ ኩሼራ ፃፊዳይ ታና ጳዉሎሳ።

22 ጎዳ ዶሶንታዴይ ዲኮ ኢዚ ቃንጌቴዳዴ ጊዶ! ጎዶ ሃያ! 23 ጎዳ ዩሱሳ ኪያቴሲ ኢንቴናራ ጊዶ።

24 ታ ሲቆይ ጎዳ ዩሱስ ኪርስቶሳ ባጋራ ኢንቴስ ኡባስ ጊዶ። አሚን።

* 16:19 ሃዋ 18:2

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
